

**BOSNA I HERCEGOVINA  
FEDERACIJA BOSNE I HERCEGOVINE  
Tuzlanski kanton  
GRAD TUZLA  
GRADSKO VIJEĆE**

# **S T E N O G R A M**

**S DVADESETREĆE SJEDNICE GRADSKOG VIJEĆA TUZLA ODRŽANE 29.  
AVGUSTA 2018. GODINE U POSLOVNOM OBJEKTU „GRAFIČAR“ U 10 SATI**

**-SJEDNICI PRISUSTVUJE 27 VIJEĆNIKA**

**U Tuzli, avgust 2018. godine**

**MIREL MIŠKOVIĆ – zamjenik predsjedavajućeg Gradskog vijeća Tuzla  
– vijećnik Tuzlanske alternative**

(Intoniranje himne Bosne i Hercegovine.) Poštovani vijećnici Gradskog vijeća Tuzla, predstavnici gradskih službi - obrađivači materijala, predstavnici boračkih i nevladinih organizacija, članovi savjeta mjesnih zajednica predstavnici sredstava javnog informisanja, dragi gosti, drugarice i drugovi, dame i gospodo, otvaram dvadesettreću redovnu sjednicu Gradskog vijeća Tuzla.

U skladu sa članom 62. i 65. Poslovnika Gradskog vijeća Tuzla, potrebno je utvrditi kvorum za rad i odlučivanje.

Konstatujem, da prema evidenciji Stručne službe Gradskog vijeća, sjednici prisustvuje 27 od ukupnog broja vijećnika 31, što je dovoljno za punovažan rad i odlučivanje.

Za današnju sjednicu svoj izostanak su najavili slijedeći vijećnici Aleksandar Vujadinović, Edim Kadić i Nevres Hurić.

Za današnju sjednicu kašnjenje je najavio Kenan Osmančević.

Podsjećam vijećnike da su svi klubovi vijećnika dobili Stenograme, a svaki vijećnik je, uz materijale za današnju sjednicu, dobio i Skraćene verzije zapisnika s 21. redovne sjednice Gradskog vijeća Tuzla, održane 27. juna 2018. godine, zapisnika s 22. redovne sjednice Gradskog vijeća Tuzla održane 16. jula 2018. godine i zapisnika s 3. vanredne sjednice Gradskog vijeća Tuzla održane 26. jula. 2018. godine.

Da li ima primjedbi na Stenograme i Skraćene verzije zapisnika? Nema.

Stavljam na izjašnjavanje Stenogram i Skraćenu verziju zapisnika s 21. redovne sjednice Gradskog vijeća Tuzla, održane 27. juna 2018. godine i pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Glasanje je okončano.

Konstatujem da su Stenogram i Skraćena verzija zapisnika sa zapisnika sa 21. redovne sjednice Gradskog vijeća Tuzla, održane 27. juna 2018. godine, usvojeni s 26 glasova za, bez glasova protiv i bez suzdržanih glasova.

Stavljam na izjašnjavanje Stenogram i Skraćenu verziju zapisnika sa 22. redovne sjednice Gradskog vijeća Tuzla održane 16. jula 2018. godine i pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Glasanje je okončano.

Konstatujem da su Stenogram i Skraćena verzija zapisnika sa 22. redovne sjednice Gradskog vijeća Tuzla održane 16. jula 2018. godine, usvojeni s. Hoćemo li ponoviti? Ništa. Ponavljamo glasanje jer jedan vijećnik nije mogao elektronski da glasa.

Znači pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Glasanje je okončano.

Konstatujem da su Stenogram i Skraćena verzija zapisnika s 22. redovne sjednice Gradskog vijeća Tuzla održane 16. jula 2018. godine, usvojeni s 27 glasova za, bez glasova protiv i bez suzdržanih glasova.

Stavljam na izjašnjavanje Stenogram i Skraćenu verziju zapisnika sa 3. vanredne sjednice Gradskog vijeća Tuzla održane 26. jula 2018. godine i pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Glasanje je okončano.

Konstatujem da su Stenogram i Skraćena verzija zapisnika sa 3. vanredne sjednice Gradskog vijeća Tuzla održane 26. 07. 2018. godine, usvojeni s 27 glasova za, bez glasova protiv i bez suzdržanih glasova.

Za današnju 23. redovnu sjednicu Gradskog vijeća Tuzla predlažem dnevni red koji ste dobili u materijalu za sjednicu:

## DNEVNI RED

- Usvajanje Zapisnika sa dvadesetprve redovne sjednice Gradskog vijeća Tuzla, održane 27. 06. 2018. godine, dvadesetdruge redovne sjednice Gradskog vijeća Tuzla održane 16. 07. 2018. godine i Zapisnika sa treće vanredne sjednice Gradskog vijeća Tuzla održane 26. 07. 2018. godine

1. VIJEĆNIČKA PITANJA I INICIJATIVE
2. RAZMATRANJE I USVAJANJE IZVJEŠTAJ O IZVRŠENJU BUDŽETA GRADA TUZLA ZA PERIOD 01. 01. DO 30. 06. 2018. GODINE
3. RAZMATRANJE IZVJEŠTAJA KOMISIJE ZA IZBOR I IMENOVANJE
4. TEKUĆA PITANJA

Podsjećam da su se, u skladu sa članom 58. Poslovnika Gradskog vijeća Tuzla, prijedlozi za naknadno uvrštavanje hitnih i neodložnih pitanja mogli podnijeti u pisanoj formi, najkasnije 48 sati prije održavanja ove sjednice, kao i da su se, u skladu sa članom 61. Poslovnika Gradskog vijeća Tuzla, zahtjevi za izmjenu predloženog dnevnog reda mogli dostaviti najkasnije 48 sati prije održavanja ove sjednice.

Obavještavam vas da je Kolegij Gradskog vijeća Tuzla održao vanrednu sjednicu neposredno pred početak ove dvadesettreće sjednice te konstatovao da u poslovničkom roku nije bilo dostavljenih prijedloga za naknadno uvrštavanje hitnih i neodložnih pitanja niti zahtjeva za izmjenu predloženog dnevnog reda.

Takođe vas podsjećam da je članom 61. stav 5. Poslovnika Gradskog vijeća Tuzla propisano da izuzetno vijećnici i gradonačelnik mogu tražiti izmjenu dnevnog reda na sjednici, te pitam da li ima prijedloga za izmjenu dnevnog reda u skladu sa navedenim članom? Ako nema, stavljam na izjašnjavanje predloženi dnevni red.

Pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Glasanje je okončano.

Konstatujem da je dnevni red u cjelini, usvojen s 27 glasova za, bez glasova protiv i bez suzdržanih glasova i to:

## DNEVNI RED

- Usvajanje Zapisnika sa dvadesetprve redovne sjednice Gradskog vijeća Tuzla, održane 27. 06. 2018. godine, dvadesetdruge redovne sjednice Gradskog vijeća Tuzla održane 16. 07. 2018. godine i Zapisnika sa treće vanredne sjednice Gradskog vijeća Tuzla održane 26. 07. 2018. godine

1. VIJEĆNIČKA PITANJA I INICIJATIVE
2. IZVJEŠTAJ O IZVRŠENJU BUDŽETA GRADA TUZLA ZA PERIOD 01. 01. DO 30. 06. 2018. GODINE
3. IZVJEŠTAJ KOMISIJE ZA IZBOR I IMENOVANJE
4. TEKUĆA PITANJA

Sada prelazimo na realizaciju dnevnog reda današnje dvadesettreće redovne sjednice Gradskog vijeća Tuzla.

## VIJEĆNIČKA PITANJA I INICIJATIVE

Vijećnička pitanja u pisanoj formi, priložili su slijedeći vijećnici, pa ih pozivam da ih, u skladu sa članom 163. Poslovnika Gradskog vijeća Tuzla, ukoliko to žele, pročitaju slijedećim redoslijedom. Prva je Sabiha Mujkanović, vijećnik SBB.

### SABIHA MUJKANOVIĆ – vijećnik Saveza za bolju budućnost

Pozdravljam sve prisutne. Evo ja sam za danas pripremila tri vijećnička pitanja.

Prvo pitanje postavljam gradonačelniku i nadležnoj službi.

Šta se dešava i da li smo se odrekli kulturnog odmarališta Općine Tuzla u strogom centru Neuma i ko je kriv za devastaciju tog objekta?

Zemljišna parcela objekta ima preko 1300 m<sup>2</sup>. U centru Neuma. Objekat ima kompletnu infrastrukturu. Vlasnički odnosi neprijekorni, vlasnik i posjednik Skupština općine Tuzla. 1/1. Bez bilo kakvih tereta i ograničenja.

Ovo je prva nekretnina koja je u Neumu vraćena vlasniku nakon završetka rata u BiH, bez značajnih oštećenja. Došli su tada majstori iz Tuzle, „ispustili” vodu iz cijevi da ne bi došlo do mržnjenja, osigurali elektroinstalacije. I na tome se stalo.

Objekat je zaključan, kao i ulazna kapija u dvorišni prostor. Od tada je prošlo preko 20 godina a objekat propada zbog nekorištenja i izostanka bilo kakvog održavanja. Za to vrijeme zaposlenici općine, sada Grada Tuzla skupo plaćaju sobe i apartmane u kojima ljetuju, a njihovo odmaralište zjapi prazno i napušteno od svog vlasnika.

Cijena 1 m<sup>2</sup> građevinskog zemljišta na ovoj lokaciji, a koje ima svu infrastrukturu i druge pogodnosti, zvanično iznosi oko 1.000,00 KM. Dakle, bez objekta, zemljište ima tržišnu vrijednost od preko milion i tristotine hiljada konvertibilnih maraka! Zanima me zašto smo se očigledno odrekli ovog objekta, ovako vrijedne nekretnine? I da li će ikada iko odgovarati zbog njegove devastacije i umanjenja vrijednosti objekta?

Drugo vijećničko pitanje postavljam Ministarstvu unutrašnjih poslova Tk. Dokle se stiglo sa istragom vezanom za nestanak/krađu 72 djela iz fundusa Galerije?

Dakle, s obzirom da je u periodu od 1992 godine od 2010. godine nestalo ili ukradeno 72 djela iz fundusa Galerije, za što je podnesena prijava nadležnim organima 2011. godine dokle se stiglo sa istragom istih?

U periodu od 2011. do 2018. godine pronađeno je 11 djela, a i dalje se traga za 61 djelom. Zanima me da li se došlo do nekih pomaka u istrazi i da li ima novih informacija o nestalim djelima?

Treće pitanje postavljam Javnom komunalnom preduzeću Komunalac Tuzla. Na osnovu kojih akata direktor upućuje radnike Komunalca da po najvećoj temperaturi kose zelene površine?

Obrazloženje. Na osnovu kojeg zakona, standarda ili drugih pravno valjanih akata, direktno odnosno njegovi šefovi upućuju radnike da po najvećoj temperaturi od 12 h do 15 h, kada se preporučuje sklanjanje sa osunčanih površina, kose zeleni pojas na Južnoj magistrali?

Takođe, čime se pravda slanje radnika u najzagađenije područje? Predlažem da se prekine ova praksa sa ciljem zaštite života i zdravlja radnika i drugih učesnika. A posebno je pitanje šta bi se desilo i ko bi bio odgovoran kada bi došlo do ozljeđivanja radnika od udara

motornim vozilom. Da li uopće postoji dozvola za te aktivnosti od nadležnih organa unutrašnjih poslova? Hvala.

### **MIREL MIŠKOVIĆ**

Zahvaljujem. Iduća na redu je Lejla Osmančević, vijećnica SBB-a. Pa je molim da pročita vijećničko pitanje.

### **LEJLA OSMANČEVIĆ - vijećnik Saveza za bolju budućnost**

Zahvaljujem predsjedavajući. Pozdravljam sve prisute s obzirom da se prvi put javljam za riječ, pozdravljam kolege vijećnike, predstavnike medija, obrađivače materijala, kao i gledaoce RTV-7 koji će pratiti snimak ove sjednice.

Moje vijećničko pitanje postavljam Službi za komunalne poslove, izgradnju i poslove mjesnih zajednica.

Kada će se realizirati završetak mosta na rijeci Jali, na relaciji Brčanska Malta kula „G“ - Stupine?

Obrazloženje. Na veliku žalost izgradnja ovog mosta bila je popraćena je nesrećom u kojoj je izgubljen ljudski život. Mene zanima kada će doći do završetka istog s obzirom da se nakon poduzetih mjera i istražnog postupka trebalo odmah pristupiti završetku radova na mostu, kako bi građani što prije zaboravili na ovaj nemili događaj? Ova pješačka šetnica je odavno potrebna i mi smo o tome, kroz vijećnička pitanja isticali njen završetak.

Zato i tražim da se što prije realizira njen završetak. Hvala.

### **MIREL MIŠKOVIĆ**

Zahvaljujem. Pozivam vijećnika Elvira Kasumovića, vijećnika SBB-a da pročita vijećničko pitanje.

### **ELVIR KASUMOVIĆ – vijećnik Saveza za bolju budućnost**

Zahvaljujem dopredsjedavajući. Veliki pozdrav gledaocima koji će ovu sjednicu pratiti putem malih ekrana i svima u sali Gradskog vijeća.

Moje vijećničko pitanje upućujem Službi za prostorno uređenje i zaštitu okoline, a ono glasi.

Kada će se izdati građevinska dozvola za izgradnju puta Dokanj - Šibošnica?

Obrazloženje. U pitanju je regionalni put Tuzla - Čelić. Naime, tender za izgradnju puta je već otvoren, poznat je i izvođač radova ali je neophodna građevinska dozvola koju izdaje Grad Tuzla. Znači samo se stalo radi građevinske dozvole. Zanima me kada će se izdati građevinska dozvola kako bi se moglo započeti sa radovima na ovoj dionici puta?

Znači sve čeka samo građevinsku dozvolu. Ako uzmemo razmatranje na ranijim sjednicama rekli smo da Tuzla mora imati neke alternativne pravce prema određenim, odnosno susjednim općinama sa kojima graniči itd.

Ovaj je put bila i jedna žila kucavica za vrijeme rata itd. Prema tome, nadam se da administracija neće zakočiti izgradnju ovog puta, a on bi trebao evo da bude gotov do zime, ukoliko znači nadležna Služba na vrijeme odradi svoj dio posla i izda ovu građevinsku dozvolu u skladu sa zakonom, a na osnovu uslova koji su već ispunjeni.

Hvala.

## **MIREL MIŠKOVIĆ**

Zahvaljujem. Pozivam Omera Delalića, vijećnika SBB-a da pročita svoja dva vijećnička pitanja.

### **OMER DELALIĆ – vijećnik Saveza za bolju budućnost**

Hvala. Pozdravljam sve prisutne. Za ovo Vijeće pripremio sam vijećničko pitanje, inicijativu i urgenciju.

Postavljam Službi za komunalne poslove, izgradnju i poslove mjesnih zajednica.

Kada će se urediti asfaltirati put u Brđanima, mjesna zajednica Solina?

Obrazloženje. Izgradnjom vodovoda put u Brđanima je u potpunosti uništen. Oštećen kolovoz ugrožava sigurnost građana a postoji i mogućnost pojave sjeline.

Građani se žale da svakodnevno oštećuju automobile. Građani su održali zbor na kojem je donesen zaključak da su i sami spremni učestvovati u finansiranju sanacije puta. Zanima me kada će se početi rješavati ovaj problem?

Inicijativa za rješavanje problema stanovnika naselja Vrapče, kod Elektrodistribucijev Tuzla.

Opće je poznato da se prilikom jačih padavima na ulici kod raskrsnice kod Elektrodistribucije Tuzla nakuplja velika količina vode koja onemogućava saobraćaj tom ulicom, a ono što predstavlja još veći problem je to da vozila koja su parkirana budu doslovno potopljena u vodi. To se dešava već duži niz godina i tražim da se u što kraćem vremenskom periodu riješi kako građani ne bi trpjeli zbog toga.

I urgencija. u ulici Nesiba Malkića? Pošto skoro već dvije godine diskutujem i postavljam pitanje Gradonačelniku i Službi za komunalne poslove ne bi ponavljao znači to pitanje, već sam ga priložio u pisanoj formi. Hvala.

## **MIREL MIŠKOVIĆ**

Zahvaljujem. Imamo još jedno vijećničko pitanje. Mirnesa Ajanovića.

### **MIRNES AJANOVIĆ - vijećnik Bosanske stranke**

Hvala predsjedavajući. Pozdrav svima. Nezadovoljan sam odgovorom na vijećničko pitanje koje je dostavljeno 11. 7. 2018. godien pod brojem 07-844/18 od Javne zdravstvene ustanove Gradske apoteke Tuzla.

Ja sam postavio vijećničko pitanje po kojem osnovu i u skladu sa kojom konkursnom su primljeni uposlenici u Javnoj zdravstvenoj ustanovi Gradske apoteke Tuzla. Pa sam nabrojao ih, između ostalih, Dedić Indira, Omazić Merima, Livadić Sead, Gardaš Anita, Redžić Omer, Sejranović Asja, Mešić Lejla, Tinjić Amila, Topalčević Ančica, Džinić Sanel, Beganović Samira, Selimović Erna, Bašić Amra, Rahmanović Amila, Mujezinović Mersiha, Kupusović Elma, Đerić Zerina, Đorđić Radan, Sijerčić Amela, Smajić Melisa, Šabanović Dženisa, Nikolić Gordan, Alajmović Elma, Karić Enida, Hadžiabdić Naida, Žunić Edin, Selman Vanesa, Salihović Amina i ostali uposleni od početka 2014. godine, kada je Edim Kadić primljen na mjesto pomoćnika direktora za komercijalne poslove imaju još ostala imena i pitam po kojem osnovu, kojom procedurom, dakle za svako od imena je postavljeno pitanje.

Dobijam odgovor, svi prijemi radnika u radni odnos na određeno ili neodređeno, kao i lica na stručnom osposobljavanju bez zasnivanja radnog odnosa, izvršeno je u skladu sa zakonom i statutom i opštim aktima. Ovo kao Nedžad Branković, sve u skladu sa zakonom.

Tražio sam i tražim predsjedavajući od vas, pošto ste vi po Poslovniku dužni da dobijemo adekvatan odgovor na vijećničko pitanje, da i vi zatražite odgovor za svako od ovih lica. Po kojem osnovu su primljeni? Da li su bile konkursne procedure? Da li je za bilo kojeg od ovih lica, ili ne interesuje me u stvari za bilo kojeg, za sva lica, po kojem osnovu su primljena i ostala lica koja su od 2014. godine do danas primljena u Javnu zdravstvenu ustanovu. Da li je bilo bilo gdje provedena konkursna procedura, kako su provodili, na osnovu čega su birali, da li je i ko je, na kakav način Edim Kadić doveo za ruku koga za ruku, direktorica ili neko drugi od uposlenika.

Kako su se ljudi javili za ta radna mjesta? Kako su saznavali za radna mjesta? Gdje su objavljivana, dakle ili objavljivane informacije za potrebe tih radnih mjesta. Da li je to bilo negdje na internet stranici, u novinama ili na zvaničnoj službenoj tabli. Da li je bilo gdje, dakle bilo šta objavljeno prije prijema? Da li su bili konkursi? Da li su putem Biroa za zapošljavanje tražili radnika, to je odgovor za svakog od lica, ove koje sam nabrojao.

Ispade da dakle ova lica koja sam nabrojao su primljena, a nama je kroz Izvještaj o radu prezentirano da nije bilo zapošljavanja, da je isti broj u stvari zaposlenih kakav je bio prije i danas.

Evo pogledajte ovdje bar 20, 30 imena je promijenjeno u toku dakle ovog perioda dok je Edim Kadić bio pomoćnik direktora i iz tih razloga tražim, nisam mislio ovo danas postavljati vijećničko pitanje, ali da ne bih profulao i propustio svoje pravo, jer je ovo tek danas nama dostavljeno, ja koristim svoje vijećničko pravo i ističem da sam nezadovoljan odgovorom i da mi se dostavi odgovor u skladu s postavljenim vijećničkim pitanjem i današnjom dodatnom dopunom obrazloženja zahtjeva koji je postavljen. Hvala vam predsjedavajući.

## **MIREL MIŠKOVIĆ**

Dobro. Zahvaljujem.

Prelazimo na vijećničke inicijative, u skladu sa članom 162. Poslovnika Gradskog vijeća Tuzla su podnijeli slijedeći vijećnici. Prva inicijativa je inicijativa Omera Delalića. To je inicijativa za rješavanje problema stanovnika naselja Vrapče kod Elektrodistribucije Tuzla, pa pitam ima li potrebe da pomenuti vijećnik obrazloži? Ništa.

## **SLADANA KRAJINA – sekretar Gradskog vijeća Tuzla**

Pa trebate razdvojiti ako je vijećnička pitanja postavljate vijećnička pitanja. Kad su inicijative, onda inicijative. buduće mislim.

## **MIREL MIŠKOVIĆ**

OK. Zahvaljujem. Druga inicijativa je inicijativa vijećnika Mirze Tupajića. To je urgencija za rješavanje problema deponovanja zemljanog materijala iz iskopa naselje Čaklovići Gornji kod tunela, mjesna zajednica Simin Han.

I imamo drugu inicijativu. To je inicijativa Nevresa Hurića, vijećnika. To je urgencija za što hitniji završetak radova asfaltiranja saobraćajnice na lokalaciji Razinoge II, Supnjača, mjesna zajednica Dobrnja. Pa pitam vijećnika Mirzu Tupajića da li će obrazložiti ove inicijative ili će ih samo priložiti?

## **MIRZA TUPAJIĆ - vijećnik Stranke demokratske akcije**

Evo neću detaljno vršiti obrazloženje obje ove inicijative, inicijativu moju i inicijativu od kolege Hurića. Samo ću kazati da su obje inicijative znači tipa urgencije i da imaju hitni karakter. Znači da se što prije to riješi dok je ovakvo vrijeme tj. dok je sezona građevinskih radova.

Hvala.

## **MIREL MIŠKOVIĆ**

Zahvaljujem. Prelazimo na drugu tačku Dnevnog reda:

### **IZVJEŠTAJ O IZVRŠENJU BUDŽETA GRADA TUZLA ZA PERIOD 01. 01. DO 30. 06. 2018. GODINE**

Obavještavam vijećnike da je u vezi sa ovom tačkom dnevnog reda:

Predlagač je gradonačelnik Grada Tuzla.

Obrađivač je Služba za budžet i finansije.

Materijal su razmatrali Komisija za ekonomske odnose, Komisija za poduzetništvo, Komisija za prostorno uređenje i zaštitu okoline, Komisija za komunalne poslove i pitanja mjesnih zajednica i klubovi vijećnika.

Pitam prisutne, da li ima potrebe da, u skladu sa članom 68. Poslovnika Gradskog vijeća Tuzla predlagač ili obrađivač daju uvodno izlaganje? Ima.

Pozivam predstavnika Službe gospođu Suadu Isaković, da da uvodno izlaganje.

## **SUADA ISAKOVIĆ – Pomoćnik Gradonačelnika za Službu za budžet i finansije**

Hvala predsjedavajući. Pozdravljam sve prisutne u sali i evo, kao što ste čuli, tačka Dnevnog reda je IZVJEŠTAJ O IZVRŠENJU BUDŽETA GRADA TUZLA ZA PERIOD 01. 01. DO 30. 06. 2018. GODINE.

Da podsjetim, da je zakonska obaveza Gradonačelnika, da tromjesečno, u skladu sa Zakonom o budžetima izvještava Gradsko vijeće. Ovo je obaveza svih vlada na nivou Federacije Bosne i Hercegovine i evo pripremljen je znači izvještaj za prvih šest mjeseci koji pokazuje presjek finansijskog stanja u Budžetu Grada Tuzla koji je ostvaren u periodu od 1. januara do 30. 6. 2018. godine.

Da podsjetim da je Budžet Grada Tuzla planiran u ukupnom iznosu od 68.380.521 marka. Da su to toga planirani prihodi i primici od 57.093.047 maraka. Da je uneseni suficit iz prethodne godine u Budžet, u aprilu mjesecu utvrđen rebalansom 10.487.473 marke i neutrošena sredstva kredita u iznosu od 800.000 maraka što ukupno znači čini sredstva budžeta od 68.380.000 maraka.

U prvih šest mjeseci, ukupno ostvarena sredstva u Budžetu Grada Tuzla iznosila su 36.241.552,42 marke od čega se na ostvarene prihode i primitke u Budžetu, u prvih šest mjeseci odnosi 24.954.078,47 a razlika do 36.000.000 odnosi se na suficit i utrošena sredstva kredita.

Procentualno ukupno ostvareni prihodi i primici u prvih šest mjeseci ove godine su, u odnosu na planirane 43%. Kada se pogleda struktura ostvarenih prihoda u Budžetu u prvih šest mjeseci može se konstatovati da smo u dijelu osnovnog fonda imamo, da kažem kontinuirano punjenje Budžeta. Da su prihodi u prvih šest mjeseci 18-te, u odnosu na prvih



šest mjeseci 17-te godine, veći za 3,42% u ovom dijelu Budžeta. Međutim, ono gdje imamo određeno zaostajanje su je Fond za komunalnu infrastrukturu. Recimo u prošloj godini, u istom periodu, je uplaćeno u ovaj Fond 12.013.000 maraka, dok je istom periodu ove godine uplaćeno manje za 2.418.000 maraka a razlog tome su ove licitacije i uplaćena sredstva za prodaju zemljišta.

Prošle godine imali smo značajniji prihod od prodatog zemljišta na lokaciji Sjenjak. A ove godine u prvih šest mjeseci su uplaćena sredstva samo za Slatinu i postignuti su manji iznosi i imamo još jednu prodaju koja je čija je procedura završena, ali sredstva još uvijek nisu uplaćena, a radi se o zemljištu na Stupinama.

Takođe evidentno je da u Fondu sredstava od naknade ostvarene radom termoelektrana imamo značajnije zaostajanje u uplatama u odnosu na prethodni period od kad je zakon uveden.

Naime, u istom periodu prošle godine u Budžet je uplaćeno 2.556.000 maraka a ove godine milion i 812, manje za 743.000 maraka.

Ono što smo mi saznali razlog za manju uplatu naknade je vršeni remont u Termoelektrani, time i manja proizvodnja električne energije, a time i manja uplata naknade.

Da li će se ovaj iznos sustići do kraja godine još uvijek ne znamo, pa u narednom izvještaju za devet mjeseci već će se vidjeti da li se ta razlika anulira za zaostatak u prvom polugodištu manje uplaćenih sredstava.

Što se tiče trošenja sredstava iz Budžeta sredstva se realizuju budžeta u skladu sa utvrđenim Budžetom od strane Gradskog vijeća i Odlukom o izvršavanju Budžeta i u prvih šest mjeseci iz Budžeta je isplaćeno ukupno 20.387.319,36 maraka ili 29,81% ukupno utvrđeni sredstava u Budžetu i nivou uplaćenih sredstava u prvih šest mjeseci ove godine, u odnosu na prošlu godinu je odprilike isti ili manji negdje za 1,37%.

U izvještajnom periodu je provedeno 68 odnosno pokrenuto 68 postupaka javnih nabavki koji nisu sve niti okončane niti su bili potpisani ugovori, odnosno završeni radovi u prvih šest mjeseci iza te poslove čija je procedura u toku u Budžetu je rezervisano 6.255.670 maraka. Rezervacije u Budžetu se vrše u skladu sa Zakonom o trezoru što ukazuje da na kraju ovaj izkazani, da ne kažem finansijski rezultat ovo je presjek stanja prikupljenih sredstava, odnosno raspoloživi u odnosu na utrošena. Vidite da smo na dan 30. 6. imamo neutrošenih 15.854.233 marke, međutim, od ovih 15 miliona i 800 već je rezervisano 6 miliona 255 za ove postupke koji su ili pokrenuti, ili za koje je potpisan ugovor o izvođenju radova.

Takođe obzirom da presjek stanja u knjigovodstvu vrši na dan do prve poovine jula mjeseca, jer je potrebno uraditi ovaj izvještaj u skladu sa Zakonom u prvih 20 dana od izvještajnog perioda, sve obaveze koje su se odnosile na šesti mjesec nisu pristigle u Službu za budžet i finansije na evidentiranje tako da procjenjujemo da smo i tu imali značajnije obaveze koje nisu znači ušle u troškove za prvih šest mjeseci.

Što se tiče ovog neutrošenih sredstava ona su na određeni način i posljedica što smo tek u aprilu mjesecu imali rebalans Budžeta, kada smo po zakonu mogli unijeti višak sredstava neutrošenih iz predhodne godine kada Gradsko vijeće rasporedi višak sredstava rebalansom Budžeta, onda se stvore zakonske pretpostavke za izmjene Plana nabavki i to su sve procesi koji traju, tako da znači ova sredstva nisu mogla biti prije trošena od viška od 10 miliona i nšetio po dinamici ja se nadam da će u ovoj, do kraja građevinske sezone, jer je najznačajniji dio ovih sredstava se odnosi na razne poslove iz oblasti komunalne infrastrukture i drugih, biti utrošena, obzirom da se u Budžetu njima raspolaže.

Evo, ja toliko, ukoliko ima pitanja. Hvala.

## **MIREL MIŠKOVIĆ**

Zahvaljujem. Pitam da li ima potrebe da se pročitaju izvještaji komisija? Ako nema. Otvaram raspravu klubova vijećnika. Prvi se za riječ javio Mirnes Ajanović, Klub vijećnika BOSS-a.

Izvolite.

## **MIRNES AJANOVIĆ**

Hvala predsjedavajući. Ja bih prije diskusije pitanje postavio, kako ne bi diskusija otišla, eventualno u negativnom toku. Pa ako dozvoljavate to je naše poslovničko pravo i evo sama je, kao predlagač, šef Službe istakla da možemo postaviti pitanja. Pitam, dakle prije diskusije. Pitam.

Da li eventualno odluka Vijeća o načinu raspodjele određenih budžetskih sredstava, u situaciji kada je ta odluka evidentno protivna zakonu koji određuje kako se ta sredstva troše, da li je šef Službe ili neko drugi, dužan obavijestiti Vijeće o obavezi da svoju odluku uskladi sa zakonom ili bez obzira što je odluka protivzakonita, šef Službe ima pravo da raspoređuje novačana sredstva prema odluci?

Molim jasan odgovor od obrađivača materijala.

## **MIREL MIŠKOVIĆ**

Hoćemo li sad odmah da odgovori? (MIRNES AJANOVIĆ – Sad odmah. Jer od toga zavisi diskusija. Da ne bi otišla diskusija u negativnom toku, bolje da dobijem odgovor. Zato smo i dozvolili da imamo pravo da postavimo pitanja kako bi izbjegli da diskusije odu u nekakvom smijeru koji može dugoi dugoročno trajati.)

U redu. Pozivam Pomoćnika gradonačelnika Suadu Isaković ako je u mogućnosti da nam da odgovor na ovo pitanje, prije diskusije.

## **SUADA ISAKOVIĆ**

Ja ne znam na što je konkretno ovdje uvaženi vijećnik mislio, ali ono što, kao šef Službe mogu reći, da Služba za budžet i finansije postupa u skladu sa važećim propisima bilo da su oni zakon, odluka ili neki drugi akt, ali stvarno se ne mogu izjasniti jer ne znam ovdje šta je o čemu je, toliko ima propisa koji se implementiraju kroz Budžet, more propisa, tako da vjerovatno ovdje ima nešto konkretno tako da mi se teško izjasniti konkretno na nekonkretno pitanje.

## **MIREL MIŠKOVIĆ**

Dobro. Zahvaljujem. Možete ostati tu. Evo izvolite još jedno pitanje.

## **MIRNES AJANOVIĆ**

Malo je nekorektno od šefa Službe da kaže da postoji more propisa i da je nekonkretno pitanje.

Postavio sam konkretno pitanje. Nezavisno je o bilo čemu. U slučaju, ukoliko donesemo odluku koja je evidentno protivna zakonu koji određuje način utroška tih sredstva koje tretira odluka, da li vi imate pravo da postupate po odluci, kao šef Službe ili ste dužni

upozoriti Vijeće da je donijelo protivzakonitu odluku i da je Vijeće dužno svoju odluku uskladiti sa zakonom koji određuje način utroška tih sredstava?

Je li vam sada jasno? i molim da odgovorite.

**MIREL MIŠKOVIĆ**

Zahvaljujem. Poslovnička.

**ALEN KAPIDŽIĆ - vijećnik Socijaldemokratske partije**

Poslovnička. Tražim pauzu pet minuta radi usaglašavanja Kluba SDP-a.

**MIREL MIŠKOVIĆ**

Dajemo pauzu pet minuta na zahtjev Kluba SDP-a. (Pauza.)

Imamo kvorum. Nastavljamo s radom. Poslije pauze Kluba SDP-a nastavljamo s radom i molim predsjednika Kluba SDP-a da obrazloži razlog pauze.

**ALEN KAPIDŽIĆ**

Ja sam rekao da usaglašavamo stavove Kluba SDP-a to je to.

**MIREL MIŠKOVIĆ**

Zahvaljujem. Pozivam predstavnika Službe za budžet i finansije gospođu Suadu Isaković da odgovori na pitanje vijećnika Mirnesa Ajanovića.

**SUADA ISAKOVIĆ**

Služba za budžet i finansije, u smislu predlaganja propisa iz nadležnosti ove Službe, uvijek postupa sa zakonom. Znači predlaže odgovarajuća akta, odluke i druge, druga dokumenta u skladu sa zakonom. A kada je u pitanju primjena Služba za budžet i finansije je dužna poštovati zakonitost u smislu važećih zakona i propisa sve dok su oni na snazi i dok ih neko ne promijeni.

Evo toliko.

**MIREL MIŠKOVIĆ**

Zahvaljujem. Nastavljamo sa raspravom. Riječ ima predsjednik Kluba BOSS-a Mirnes Ajanović. Izvolite.

**MIRNES AJANOVIĆ**

Hvala predsjedavajući. Zahvaljujem se predlagачu na odgovoru. Odgovor je bio konkretan.

To je ono na konkretno pitanje dobio sam i konkretan odgovor i još jednom se zahvaljujem.

Ovaj izvještaj je periodični izvještaj. Nijewe to izvještaj o kojem mi raspravljamo nakon protekle godine budžetske kada detaljnije razmatramo u šta su potrošena sredstva, na

koji način i kada su i mediji drugačije i više zainteresovani odnosno javnost za utrošak sredstava u protekloj budžetskoj godini.

Od toga zavisi naravno i kakav će biti budžet za narednu godinu te ovo moramo smatrati, kao što reče evo sad šef Službe zakonskom obavezom.

Ovdje ima dosta okolnosti koje, čuli smo i u izjavi, a koje ukazuju da postoje razne rezerve, situacije, tenderi, nerealizovani, nezapočeti, ali ono što je problematično i evidentno jeste, evo i sada smo slušali, kaže se da je za izvještajni period 2018-te godine, u obrazloženju, u poglavlju Rashodi ostvareni su rashodi u iznosu od 20.000.000 pa nešto još tamo, ili 29,81% u odnosu na plan i manji su za pa onda 281 pa 331 dakle 281.000 ili za 1,37% u odnosu na izvještajni period za 2017-tu godinu.

U čemu je problem? Problem je u okolnosti da će malo ko, pa redimo mediji koji su dužni obavještavati javnost o onome šta radi Vijeće, a neki imaju i naknadu, upravo radi toga da bi javnost bolje znala, malo će sjesti pa pročitati sve ovo.

Ovo je puno materijala. Uzet će svi, pa i evidentirati, možda neko i skenirati pa objaviti ovo obrazloženje koje ima 8 strana i onda kada neko gleda i kaže, pogledajte dakle, mi smo sa za šest mjeseci realizovali tek 30%.

20% nismo, ali to je samo 1,3 zarez sedam, 1,37 manje u odnosu na prošlu godinu.

Pa će neko nas kritikovati kao Vijeće, reče je li to loše pravilo iz prošle godine treba da postane praksa?

Da 20% nerealizovanog Budžeta od 68 miliona maraka. Mi smo trebali do sada imati bar koliko 34.000 maraka realizovano. Pa 20% od 34.000 maraka, koliko je to 14, 15 miliona je onako ništa. Pa se to stavlja u okvir 1,37.

Imamo onda i ovamo na drugoj strani, najveće učešće u ukupnim rashodima ima Služba za komunalne poslove, izgradnju i poslove MZ koja ima realizaciju 31%. Opet 20% fali.

U ovom obrazloženju i to predlažem kao zaključak i radi same Službe, radi Gradonačelnika i radi nas, mora postojati šire obrazloženje razloga neutrošenih sredstava.

I to je prijedlog zaključka, da uovim obrazloženjima, to smo čuli ukratko od šefa Službe za govornicom, to niko neće prezentirati nigdje.

Mora postojati, da razlika od 20% je iz razloga što imamo u rezervi novac, što smo u tenderskoj proceduri, što smo bile određene žalbe, što nije bilo moguće realizovati to iz opravdanih razloga.

I ja vjerujem da su svi razlozi opravdani. Ne mogu da prihvatim da neko kaže neću 15.000.000 maraka realizovati.

Ali kako je to prezentirano, kaže to je 1,37 manje za prošlu godinu. Ne smije loša, loše pravilo postati praksa i ovako kako je prezentirano sve nas mogu prozvati i sutra kriviti, pa i šefa Službe, a niko nije kriv.

E zato je potrebno u obrazloženju staviti u najkraćem razlog neutroška sredstava.

I mi to, kao vijećnici svi znamo. Ali, evo recite da li bilo ko to može znati ko uzme i pogleda bilo gdje gdje se objavi bude ili na stranici tuzla.ba objavljeno obrazloženje da će neko razumjeti i reče, pa pogledajte neodgovornost 20% nisu realizovali.

Meni fali ulica, nisu htjeli ulicu napraviti, kanalizaciju, vodu, centralno grijanje, ovdje imamo čak i sredstva za obezbjeđenje izgradnje, odnosno od naknade ostvarene radom termoelektrana imamo i tu višak prihoda, evo ga milion i 500. Reče neko nisu htjeli da rade, a ne znaju i nisu upoznati sa okolnostima, evo i da sad kažem i imao sam nedavno priliku da prezentiram i ostalim kolegama malo sam se više raspitivao, godišnji su odmori bili, ali ja sam imao okonost da sam tu, da nisam išao nigdje.

U pripremi je četiri faze koje idu sada odmah u realizaciju toplifikacije Šićkog Broda i ostalih, naravno i ostalih mjesnih zajednica, odnosno Bukinja u ovoj situaciji, Husino ide kasnije, ali idu te realizacije.

Ljudi su dali saglasnosti, već se krenulo u realizaciju izvođenja radova i trebalo bi da u narednom periodu to se i faktički i završava, ali to je sve trajalo radi tendera i ostalog.

Zato je potreban ovaj zaključak i da i mi i kao vijećnici znamo, ali evo mi možemo i znati, ali to ne zna neko ko će pročitati ovo obrazloženje. To neće zahtijevati nešto puno posla, još nekoliko rečenica, ili jedna, dvije, tri stranice dodatnog obrazloženja razloga neizvršenja Budžeta u odnosu na recimo pretpostavku da bi recimo za pola godine trebala da bude 50% realizacija Budžeta.

Drugo, još jedan zaključak da i sama Služba za budžet i finansije i sve ostale nadležne službe u daljoj realizaciji utroška budžetskih sredstava vrše adekvatan nadzor nad i prijemom naravno novčanih sredstava i rashodom, raspodjelom novčanih sredstava kako se ne bi desilo da dođe do kašnjenja u izvršavanju raznih projekata ili svega onoga što je rezultat odluke Gradskog vijeća, na osnovu prijedloga Gradonačelnika prilikom usvajanja Budžeta za ovu godinu.

Takođe prijedlog da tamo gdje nije bilo moguće, ili predvidjeli, ili procijeniti, ili planirati adekvatno novčana sredstva, što prije se predvidi rebalans Budžeta kako bi se do kraja godine svi projekti koji su predviđeni, sve namjene budžetske koje su predviđene, mogle adekvatno realizovati. Eto toliko. Hvala.

## **MIREL MIŠKOVIĆ**

Dobro. Zahvaljujem. Ima li još prijavljenih za diskusiju? Ima. Elvir Kasumović, vijećnik SBB-a. Izvolite.

## **ELVIR KASUMOVIĆ – vijećnik Saveza za bolju budućnost**

Zahvaljujem se. Klub vijećnika Saveza za bolju budućnost na prošlom rebalansu glasao je za Rebalans s obzirom da je jel jednim dijelom inicijativa, odnosno Amandman Saveza za bolju budućnost prihvaćen i određena sredstva iz rada Termoelektrana u visini od 85% su Odlukom Vijeća usmjerena u izgradnju i proširenje toplovoda, toplovodne mreže na području grada Tuzle.

Međutim, obzirom da Gradska uprava do sada još nije krenula u realizaciju i utrošak tih sredstava, mi ne možemo biti zadovoljni samim tim tempom i dosadašnjom indolentnošću Gradske uprave. Prema tome, dokle god se ta sredstva koja smo kao Gradsko vijeće jednoglasno donijeli odluku ne počnu i trošiti onim tempom i na zahtjev građana u skladu sa onim zahtjevima građana koje su građani tražili, a Gradska uprava na čelu sa gradonačelnikom, obećala građanima da će se to raditi na terenu, mi ne možemo prihvatiti ovaj izvještaj zbog toga što sredstva se ne troše i ne realizuju se inicijative Gradskog vijeća po pitanju toga.

S tim u vezi smatramo da smo još jednom izigradni bez obzira i da smo prihvatili rebalans Budžeta, a evo opet se sredstva ne troše i čekaju se, ne znam već, šta možda oktobar itd. da bi se počelo sa nekom realizacijom.

Dosadašnjim radom, dosadašnjim tempom, kako se to do sad radi, kako to radi gradska administracija, mi nismo zadovoljni kao i građani na terenu. Jer imali ste sami priliku da vidite da su građani nekoliko puta opet dolazili protestovali, još uvijek protestuju građani mjesne zajednice Šićki Brod i Bukinje zbog nerealizacije svega toga što smo mi donijeli ovdje na Gradskom vijeću.

S tim u vezi mi ne možemo podržati ovaj izvještaj i bit ćemo suzdržani po tom pitanju, a razloge sam evo iznio u ime Kluba. Hvala vam.

## **MIREL MIŠKOVIĆ**

Dobro. Zahvaljujem. Klub vijećnika stranke, aha, replika Mirnes Ajanović. Izvolite.

## **MIRNES AJANOVIĆ**

Evo upravo ovo što sam govorio, neadekvatno obrazloženje rezultira sad situacijom da jedan klub neće podržati izvještaj, imaju to pravo, ali da smo imali to šire obrazloženje, siguran sam da bi i oni prihvatili bez obzira što nije došlo do realizacije projekta.

Svi mi odgovaramo pred građanima i niko ne može braniti nerealizaciju određenih projekata, pogotovo što se približava zima. Evo kada konkretno govorimo o mjesnoj zajednici Šićki Brod i Bukinje.

O toplifikaciji istih, i može se desiti da će ljudi opet morati nabavljati ugalj i doći u situaciju da neće biti priključeni na vod centralnog grijanja.

Ono što sam ja imao priliku da saznam što smo saznawali na sjednicama Kolegija Gradskog vijeća, pa i van toga, postojali su zaista određeni objektivni problemi, pa i kod samih građana koji nisu znali na koji način, ili nisu bili sigurni, ili nisu imali povjerenje da predaju zahtjeve bojeći se da će objekti koji nisu legalni doći u situaciju da sutra možda budu i ugroženi na način da imaju pravne probleme zbog toga.

I trebalo je tim ljudima objašnjavati i obrazlagati da to neće biti slučaj. To smo mi na sjednicama Kolegija više nego na sjednicama Vijeća, svi razmatrali, imali smo predstavnike Službe za prostorno uređenje i Službe za komunalne poslove i gdje smo donijeli, uslovno rečeno određena uputstva građanima kako da podnesu zahtjeve.

Ja sam također, u ime određenog broja građana, lično podnio zahtjev da bi ih inicirao i uvjerio da neće biti prevare, da neće njihovi nelegalni objekti doći u pravni problem zbog prijave, jer tada dolaze u postupak zahtjeva za legalizaciju. A imali smo okolnost da ne bi se od strane Službe za prostorno išlo u taj postupak, nego bi se samo pribavila odluka o predaji dokumentacije i zaista moram da kažem, iako je došlo do kašnjenja, bili su ti tenderi. Tenderi su u toku za već određene projekte završeni i za IV fazu se očekuje za desetak ili sedam dana završetak tendera i realizacija projekta, to je ono što sam ja saznao, postoji velika uvezanost sada Službe za prostorno, Službe za komunalne poslove i menadžmenta Centralnog grijanja.

Sam sam se u više situacija uvjerio kada nazovem, kada građanin pozove i traži informaciju šta je s njim ili fali neki dokument u roku od nekoliko sati obje službe, u saradnji sa Centralnim grijanjem, završavaju proceduru i obezbjeđuju građanima uslove da vod može proći kroz njihovo zemljište ili doći do njihove kuće.

Ali ovo mi ne znamo. Evo ja znam. Ne znaju ostale kolege, nisu imali priliku. Ja sam kažem sticajem okolnosti evo moram reći i sa te pravne strane bio u prilici da direktno učestvujem u tim predavanjima zahtjeva i šta je sve potrebno i kakoljudima objasniti, kako ih privoliti da predaju zahtjev.

Zato imamo ovu okolnost gdje je recimo već jedan klub, ne znamo šta će biti dalje, zauzima ovakav stav, a ja bih kao vijećnik bio zadovoljniji da svi prihvatimo izvještaj i da idemo dalje i da građani na terenu budu zadovoljni sa realizacijom.

Građani i kad bi nabrojali bilo kakve u opravdane u potpunosti razloge oni gledaju to sa svoje lične strane, njima nije to došlo pred kuću. Neće imati grijanje ove godine, eventualno neko i oni, kako kaže kolega Kasumović, opravdano negoduju, ali u ovim situacijama samo da imamo to šire obrazloženje, mi kao vijećnici onda bi imali, mi spoznaje

šta se sve uradilo i onda bi možda i konkretnije reči, ilil kritikovati, onoga ko to nije nparavio zašto nisi ovo poduzeo prije, ili možda reči u redu zaista objektivni su razlozi bili nisu ni službe, ni gradonačelnik, ni Vijeće krivi z bog stanja koje je bilo prouzrokovano i zakonima i zakonskim procedurama i tenderima i na žalost žalbama na tendere ili na sreću, moramo i to imati, svim tim procesima kojim moraju proći da bi se moglo pristupiti izvođenju radova.

A evo u narednih nekoliko dana, ono što ja znam, ako mene nisu prevarili, kreću radovi za priključak određenog broja građana, na toplifikaciju u Šićkom Brodu i Bukinju. Eto toliko.

## **MIREL MIŠKOVIĆ**

Hvala lijepo. Za repliku se javio Elvir Kasumović SBB. Izvolite.

## **ELVIR KASUMOVIĆ**

Uz uvažavanje prejudiciranja gospodina Ajanovića, moram da kažem, da Savez za bolju budućnost i pored obrazloženja opet ne bi to podržao.

Nama ne trebaju obrazloženja. Nama trebaju rezultati rada na terenu. Dokle god su građani Tuzle nezadovoljni i mi smo samim time nezadovoljni. Prema tome, s potpunim pravom smo iznijeli svoje stavove i izkazali svoje nezadovoljstvo. Ja znam da ovdje nezadovoljstva ima još dosta tako i evo ima nezadovoljstva gdje se trebalo za šest mjeseci pokrenuti da kažem Zona Sjever itd. evo dvije godine se i više prošla i dalje se ne pokreće itd.

Postoji tu jedno opšte nezadovoljstvo, ali da ne širimo temu, držimo se ovoga, mi smo glasali za Amandman kažem i za Rebalans Budžeta, podržali smo, vjerovali smo, ponovo smo dali povjerenje ovoj Gradskoj upravi a ponovo smo izigrani od strane Gradske uprave i rukovodstva, počev od gradonačelnika pa dalje.

Znači dokle god su građani nezadovoljni na terenu i dokle god se ne izvršava ono što se obeća građanima Savez za bolju budućnost to neće podržavati. Hvala.

## **MIREL MIŠKOVIĆ**

Dobro. Zahvaljujem. Za riječ se dalje javio klub vijećnika SDA, predsjednik Kluba Mirza Tupajić. Izvolite.

## **MIRZA TUPAJIĆ - vijećnik Stranke demokratske akcije**

Hvala. Klub vijećnika prilikom donošenja Budžeta, Klub vijećnika Stranke demokratske akcije imao je nekoliko Amandmana koji bez nekog posebnog obrazloženja su odbijeni i smatramo da nismo imali nikakvo učešće u planiranju znači ovog Budžeta i tada smo kazali da Budžet ne odražava stvarne potrebe građana grada Tuzle i svaki dan sve više i više dobijamo informaciju od građana da je to ona tvrdnja tačna. Vidimo mnoge nerealizovane planirane projekte, znači izuzetno spora dinamika realizacije znači projekata.

Vidimo ogromne komunalne probleme da se građani već, na neki način bude, tj. da negoduju vidjeli smo tamo zborove građana koji su bili u prethodnom eriodu mjesna zajednica Tušanj, mjesna zajednica Šićki Brod, dopis mjesne zajednice, znači Zbor građana Mjesne zajednice Solana itd. itd.

Mi nećemo podržati ovaj izvještaj. Bit ćemo prilikom glasanja suzdržani. Najveći razlog je taj da nismo imali priliku da učestvujemo znači u planiranju Budžeta, barem malo da se uvaži određeni neki naši Amandmani, a samim tim vidite, kad pogledamo kakva je

dinamika realizacije određenih projekata, jako je spora. Evo za mjesec ipo dana je kraj građevinske sezone neki znači planirani projekti neće biti realizovani. Hvala.

### **MIREL MIŠKOVIĆ**

Dobro. Zahvaljujem. Replika Mirnes Ajanović. Izvolite.

### **MIRNES AJANOVIĆ**

Ni ja u ovom Budžetu nisam učestvovao ni na kakav način. Ni jednu jedinu marku. Inače to nisam nikada ni radio. Budžet je dužan predložiti Gradonačelnik, a onda mi, možemo to eventualno popravljati ili ne, a uvijek je opravdanje kada je već napravljen, teško je to izmijeniti osim kada dođu kasnije sredstva, eventualno dodatna, a onda kroz rebalans se to radi.

Ali smatram da, bez obzira ako nismo učestvovali u nečemu, imamo obavezu to što je trošeno da analiziramo i ako to nije dobro odbijemo, odnosno ne glasamo.

Ali samo principijelno u smislu, evo meni nešto nisu usvojili pa sad ja to neću ni da usvajam, odnosno raspravljamo o tome niti glasam za to jer mi nisu usvojili, nije u redu.

Mislim da trebamo bez ikakve ljutnje te principe koje imamo nekako i političke i ljudske i sve, nekada ostaviti po strani kada su u pitanju opšti interesi i ti opšti principi gdje smo mi dužni u svakom trenutku biti u službi građana i biti korisni građanima.

Mi smo danas korisni građanima kad ovaj izvještaj razmatramo i kad sredstva koja mi nismo uticali da se odobre, dužni smo donijeti Budžet, pokušavamo usmjeriti na način da prvo zakonito se troše, naravno to podrazumijeva se i obaveza, ali opeza radi, što da ne ponovo istaći, ali i da se brže troše, odnosno u skladu sa programom, planovima i kako reče kolega Kasumović, opravdanim zahtjevima građana na terenu.

Zato opet, evo opet istićem, nedostatak obrazloženja kašnjenja u određenim realizacijama projekata dovodi do ovog da evo i drugi kolega, drugi klub ukazuje na to, da pored tog principa, evo ja svakako nešto nisam zadovoljan, što imam pravo, rezultira ovim, dakle još više potvrđuje zaključak koji sam predložio da ga treba donijeti, pa pozivam i kolege, odnosno klubove koji eventualno ne glasaju za izvještaj da podrže zaključke kako bi naredne izvještaje, periodične, pogotovo dakle, ne ovaj konačni, ja razumijem za konačni možemo tada raspravljati na razne načine. ali ovaj periodični gdje smo dužni da svojim doprinosom ubrzamo realizaciju projekata i izvršenje budžeta imamo mogućnost u narednom periodu da budemo efikasniji. Hvala.

### **MIREL MIŠKOVIĆ**

Dobro. Zahvaljujem. Replika Mirza Tupajić. Izvolite.

### **MIRZA TUPAJIĆ**

Hvala kolegi Mirnesu na ukazivanju na neki ovdje moj istup. Ja mislim da on mene nije baš najbolje razumio. A donekle je u pravu.

Nije ovo princip znači, mi nismo dobili priliku da se suožimo sa našim Amandmani a samim tim da učestvujemo u kreiranju znači Budžeta Grada Tuzle, nego, glavni razlog jeste da smo i tada smatrali analizom znači budžeta, a i danas smatramo, da ovaj Budžet koji je tada donesen, ne odražava stanje ni potrebe građana grada Tuzle.



Uz male korekcije da bi možda bio mnogo mnogo bolji i evo samim tim pokazalo se to i da, drugi znači razlog jeste slaba, spora dinamika realizacija planiranih projekata.

Klub vijećnika Stranke demokratske akcije uvijek je podržavao sve ono što je dobro za građane grada Tuzle.

Nekada, naše članstvo nije, nisu razumjeli neke naše odluke koje smo mi podržali ovdje na Vijeću, imali smo znači kritike, bez obzira na to mi smo to mnoge stvari ovdje podržavali gdje smo mi kao Klub smatrali da je to za dobrobit grada Tuzle. Hvala.

## **MIREL MIŠKOVIĆ**

Dobro. Zahvaljujem. Za riječ se dalje javio Klub vijećnika Tuzlanske alternative. Predsjednik Kluba Nedžad Malikić. Izvolite.

## **NEDŽAD MALIKIĆ – vijećnik Tuzlanske alternative**

Hvala predsjedavajući. Valja ovdje, evo slušajući sve ove diskusije, želim istaći neke stvari kada su u pitanju realizacija i nerealizacija određenih projekata.

Mislim da ovdje prvo moramo znati da Zakon o javnoj nabavci je najveća kočnica realizacije mnogih ovih projekata i to onaj ko je se suočavao sa ovim problemom vrlo dobro zna o čemu se radi, jer znači ugovorena strana u jako ne, u jako nezgodnoj situaciji je ti uvijek taj koji prođe sa postupkom može do samog potpisivanja odustati i da ti sve znači jednostavno padne u vodu ta tri četiri mjeseca i da se izgubi i to je jedan od velikih problema kojim, s kojim se suočava sva javna preduzeća, sve javne ustanove, tako i, i grad Tuzla koji realizira sve ove projekte.

I ja mogu sa sigurnošću reći da je najveća kočnica upravo ovaj zakon koji je na ovaj način definisan i ja se nadam da će u nekom narednom periodu doći do izmjene tog zakona, gdje će se na lakši način provoditi postupci, gdje, gdje se lakše dolaziti do rješenja svih ovih problema. Jer samo znamo, hajde jedna obična žalba traje po dva mjeseca, po trideset dana i tako dalje i tako dalje i onda ide žalba na žalbu, žalba na žalbu i to se otegne u, u, u besvjest.

Ja bi volio na neki način da svi ovi vijećnici koji su danas diskutovali i imaju hajd na neki način problema i misle da nije neko htjeo da nešto realizuje malo dođu u Službu za komunalne poslove i već neke druge službe pa da vidimo sa kakvim se problemima suočavaju te službe kada je u pitanju javna nabavka.

S druge strane imamo veliki problem kad je u pitanju imovinsko-pravni odnosi. Evo neko je spomenuo dole poslovnu zonu. Imamo evo, hvala bogu, krenulo je se što se tiče Poslovne zone Kreka-sjever, gdje imamo eno početak realizacije jednog pilot projekta koji će se pokazat jako uspješan i jako dobar, a upravo tu imamo problem kad su imovinsko-pravni odnosi u pitanju. I tako dalje i tako dalje.

Znači sve se svodi na dvije stvari, ne da neko nešto neće realizirati nego jednostavno da se dođe u situaciju da ti biraš i da moraš poštovati što smo maloprije razgovarali zakonske osnove.

Neće niko potpisat ništa što će za sutra otići i odgovarati. Ni jedan pomoćnik gradonačelnika, niti jedna služba niti ijedan pojedinac. Tuzlanska alternativa je glasala za budžet, ponosna je na ovaj budžet ovakav kakav jest, ponosna je na sve ono što je se do sad realiziralo i ono što će se realizirati i shodno tome mi ćemo podržati naravno ovaj izvještaj o izvršenju budžeta za ovih šest mjeseci i naravno da treba još jednom još više ako treba se potruditi da što više projekata i sa ovim svim problemima na neki način bude realizirano u nekom narednom periodu.

Ja želim samo istaći da smo već evo dvije godine upoznati su svi vijećnici, a radi se znači o putu kroz rudnik Soli koji se trebao realizirati iz kreditnih sredstava. Vjerujte mi svako ko je upoznat s tim problemom vidi na koje probleme se nailazi i na što se nailazi i kako je na kraju krajeva taj koji je dobio da uradi projekat kočio više mjeseci, da ne kažem godinu dana u realizaciji samog tog izraditog projekta a ne govorim za ostalo. Znači samo se treba malo dublje uključiti i vidjeti u čemu je problem i onda ćemo vidjeti da li je neka služba zakazala ili je uradila maksimalno sa svoje strane koje, ko, o, ono što je mogla. Još jednom, ovaj, hoću da istaknem da će Tuzlanska alternativa naravno podržati ovaj izvještaj o Budžetu. Hvala.

## **MIREL MIŠKOVIĆ**

Dobro. Zahvaljujem. Replika. Mirnes Ajanović. Izvolte.

## **MIRNES AJANOVIĆ**

A haman ovaj avgust bio dug pa nešto poželio se raspravljati. Ima i toga. A drugo replika mom dragom kolegi, kao i svima ostalima koleginicama, Nedžad, rekao je da Zakon o javnim nabavkama ne valja i nije on to tako mislio.

U dijelu je u pravu da u dijelu ne valja. Mi ne smijemo dozvoliti neprimjenjivanje zakona nije to ni mislio, nego govorim samo u dijelu, kasnije ću obrazložiti gdje ne valja i kako treba otpilike, šta treba uraditi.

Mi kad ne bi imali Zakon o javnim nabavkama imali bi situaciju recimo kao što je to u jednoj javnoj ustanovi u gradu Tuzla 30.000.000 maraka jedna osoba koristila da ide od firme do firme i kupuje proizvode i sebi ostvari mogućnost, 1% je 300.000 maraka, a kažu 10% je otprilike optimalno 3.000.000 maraka zarade.

Zamislite kad bi sada svakoj javnoj ustanovi, javnom preduzeću dali mogućnost da od koliko 68.000.000 budžetskih sredstava idu i traže, kupuju kako hoće.

Dakle, Zakon o javnim nabavkama je dobar kao zakon. Gdje nevalja? Ovo što kolega Malikić kaže.

Nevalja u smislu, evo predlažem zaključak, da tražimo izmjenu propisa na način da se skraćuju rokovi žalbi, obrazložiti razloge zbog čega, jel dolazimo u ovakve situacije kakve dolazimo, skratiti rokove odgovora, dakle nadležnih organa po žalbama.

Ovakve situacije koje je kolega Malikić dobro predstavio u smislu odustajanja sankcionisati velikim kaznama, da ne kažemo onemogućiti odustajanje, jer moguće da to ne može, ali razmisliti o tome, ali bar velikim kaznama sankcionisati lica koja odustanu, jer se može desiti da neko dođe iz namjere manipulacije ostvarivanja nekakve dobiti pa koja mu se kasnije bude svidjela pa kaže e sad ja neću i ostavi nas nakon tri mjeseca, četiri u situaciji da je gotovo, prošla je sezona izvođenja radova.

Dakle, da idemo ka izmjenama zakona u ovom smislu, da zatražimo ako je potrebno od službi naravno a što da ne za komunalne poslove i od drugih javnih preduzeća još te druge dijelove ili spoznaje gdje su oni vidjeli gdje zakon treba izmijeniti, osim tamo gdje neki traže da se zakon ne primjenjuje, kao što to traži Javna zdravstvena upo, ustanova Apoteke, Gradske apoteke Tuzla, oni bi da ne primjenjuju zakon.

Zakon ima da se primjenjuje na sve što je preko 6.000 maraka. Sve što se nabavlja preko toga mora biti tender, Javni oglas, na internetu, na zvaničnoj stranici Agencije za javne na, Državne agencije za javne nabavke i da svi javno i transparentno učestvuju u mogućnosti nabavke ili prodaje ili šta god, roba, usluga kako bi grad Tuzla dobio što jeftinije usluge i spriječila bilo kakva korupcija, manipulacije i bogaćenje pojedinaca. Dakle to nam treba.

I još jedan zaključak iz ovog što je rekao kolega Malikić. Tražimo da svi nadležni organi, službe, preduzeća, na koje se odnose realizacije ili realizacije izvršenja budžeta odmah po usvajanju budžeta pokrenu proceduru tendera, odnosno nabavke usluga, roba ili bilo čega, a ne da se sjedi i čeka. Evo budžet usvojen pa nešto sad možemo mjesec dana eventualno ili dva čekati dok to prođe, odma, dakle odrediti rokove obaveze realizacije svih nabavka roba kako bi se kroz ove postupke objave tendera, žalbi, odustajanja, eventualno opet smanjili ti periodi do obezbjeđenja uslova za obezbjeđenje i nabavke roba i izvršenje usluga. Hvala.

### **MIREL MIŠKOVIĆ**

Zahvaljujem. Replika. Nedžad Malikić. Klub vijećnika Tuzlanske alternative. Izvolte.

### **NEDŽAD MALIKIĆ**

Naravno, ja sam rekao da je zakon loš i da je kočnica, a ja nisam ni jednog trenutka rekao da se ne sprovodi. Zakon o javnoj nabavci se mora sprovoditi ovakav kakav jeste, ali je velika kočnica u realizaciji svih naših projekata, svih projekata za one ustanove, preduzeća i ostale organe koji znači sprovode javnu nabavku.

A isto tako, ugovorinoj organi, ja podržajem ovu inicijativu i mislim da će ići izmjena zakona u ovom dijelu da olakša na način da su već ugovoreni organi koji rade dostavili svoje prijedloge, gdje su to manjkavosti i ja se nadam da će to se u narednom periodu taj zakon upravo izmijeniti u tom dijelu koji je kočnica svih ovih projekata.

Još jednom hoću da podvučem da Zakon o, o javnoj nabavci ovakav kakav jest se mora provoditi, znači svi organi koji to moraju. Znači ni jednog trenutka nisam rekao da se to ne treba, ili ne daj bože ne, ne, ne, ne sprovodi kada su u pitanju javne nabavke. Toliko i hvala.

### **MIREL MIŠKOVIĆ**

Zahvaljujem. Ispravka krivog navoda. Mirnes Ajanović. Izvolte.

### **MIRNES AJANOVIĆ**

Ni jednog trenutka ni ja nisam rekao da je kolega Malikić istakao da zakon ne treba provoditi, nego u dobroj prezentaciji problema u okviru provođenja zakona izgovorio je da zakon ne valja i da ne bi ostalo to u javnosti tako.

Iz ovih razloga sam ja faktički obrazložio, pa i sad ova replika kolege Malikića mislim da nije bila potrebna, ali je dobro da je rekao dodatno da ne ostane negdje ko bude pratio, evidentirao, da kaže neko je iz Vijeća rekao (MIREL MIŠKOVIĆ - Da ne treba poštovati.) zakon ne treba poštovati.

Dakle svi smo mi u obavezi, zakon se mora poštovati i ja u svojoj replici nisam ni jednog trenutka ukazao na to, ali je dobrim primjedbama i dobrom primjedbom kolega Malikić i mene potakao da predložim ovaj zaključak u smislu izmjene tih loših dijelova zakona koji su zaista kočnica u realizaciji projekata i Gradskog vijeća, odnosno grada Tuzla.

### **MIREL MIŠKOVIĆ**

Dobro. Zahvaljujem. Dalje za riječ se javio Klub vijećnika SDP-a. Ispred njega je Elvir Bijedić. Uvaženi vijećnik. Izvolte.

## **ELVIR BIJEDIĆ – vijećnik Socijaldemokratske partije**

Zahvaljujem predsjedavajući. Pozdravljam građane Tuzle koji će ovu sjednicu posmatrati putem malih ekrana, kao i sve prisutne u ovoj sali, obzirom da se prvi put javljam za riječ.

Dakle, Klub SDP-a, Klub vijećnika SDP-a je razmatrao izvještaj o izvršenju Budžeta grada za protekli period prvih šest mjeseci nalazi da je on u jednoj kvalitetnoj dinamici, obzirom na okolnosti i mogućnosti u kojima se služba, kako Služba za finansije, tako i ostale službe ovaj našli ka tom, kad to kažem, prije svega mislim na evo stvari o kojima su prethodnici govorili i istakli, a tiče se dakle situacije da smo mi krajem aprila tek unijeli kroz rebalans 10.000.000 maraka, sjećamo se svi te sjednice i kako su rekli prethodnici s ponosom mogu reći da je budžet bio zaista, da tako kažem, korektan, ali javio se tu problem i ja sam pažljivo slušao gospođu Suadu Isaković da je tek tad bilo moguće raspisati javne nabavke.

Znači, pazite radi se o kraj aprila mjeseca, pa tek onda javne nabavke. Ja neću više uzimati dragocjeno vrijeme svima nama, već su prethodnici rekli na kakve probleme i šta to sad vuče za sobom. Tako da moram da kažem i kolegi Kasumoviću ja ne bih, ja razumijem, da vjerovatno on u razgovoru sa, sa građanima je osjetio neko nezadovoljstvo i negdje u pojedinim dijelovima grada, ali nazvati to opštim nezadovoljstvom, ja mislim da je insinucija.

Ja nemam takav dojam. Iskren da budem i ja sam građanin ovog grada i ja svakodnevno komuniciram sa velikim brojem ljudi.

Sigurno da ukoliko postoji dobra volja vijećnika svih nas ovdje, onda mi možemo isto tako da razgovaramo s tim građanima, da im ukažemo na probleme s kojima se susreću pojedine službe, a to je upravo ovakva, ovakvi problemi koji se tiču javnih nabavki.

Dakle, naravno da treba ljudima objasniti kad je u procedura instaliranje na centralno grijanje, evo inicijativa SDP-a je bila da se to stavi na web stranicu, ali svakako da i živi kontakt s ljudima može uveliko poboljšati stvari.

Dakle, jedna dobra volja, jedna kako bi reko opsežna akcija svih nas. Ako zaista postoji dobra volja a ne samo oštre strelice prema službama za koje mislim, dakle da u ovom trenutku nisu opravdani.

Ono što nas zabrinjava, dakle svakako da je to slabiji priliv od, ostvaren radom Termoelektrane, ja se iskreno nadam evo da i mi u Klubu vijećnika smo razmatrali tu situaciju, da, dakle izražavamo nadu da će do kraja godine se to ipak da tako kažem stići sve zacrtan obzirom da znamo koliko nam i kak, koliko nam ta sredstva znače.

Klub vijećnika SDP-a će svakako podržati ovaj izvještaj o izvršenju Budžeta Grada Tuzla i evo kažem nadam se da ćemo se još jednom podcrtavam svi uključiti u jednu dobronamjernu akciju obavještavanja, da ovdje znači ne radi ni o kakvom, ni o kakvoj opstrukciji, nit indolentnosti kako kolega Kasumović kaže, nego zaista objektivnim poteškoćama s kojima se službe, službe suočavaju. Zahvaljujem.

## **MIREL MIŠKOVIĆ**

Dobro. Zahvaljujemo. Replika Elvir Kasumović. Izvolte.

## **ELVIR KASUMOVIĆ**

Da sam u pravu kada kažem da se radi o indolentnošću samo neka odu u susjedne

općine Tuzlanskog kantona, da ne govorim dalje i pogledaju kako se realizacija vrši u rekordnom roku. Samo toliko. Hvala.

### **MIREL MIŠKOVIĆ**

Dobro. Zahvaljujem. Replika Alen Kapidžić, SDP. Izvolte.

### **ALEN KAPIDŽIĆ**

Pa mi kad razgovaramo o nekim stvarima, svako to uzima kako njemu odgovara. Znači evo sad kad kažemo trebamo pogledat nešto gore onda ovi iz opozicije koji imaju zadatak, naravno da kritikujemo i kaje nemojte vi gledat ove druge, a baš me interesuje koje su to opštine? Baš me interesuje. U godini dana 38.000 ljudi ode, četrdeset iz Bosne i Hercegovine, o čemu pričamo. Trebamo mi ovaj to, jesul to potrebe građana? Ako su to potrebe građana onda možemo i o tome razgovarat.

### **MIREL MIŠKOVIĆ**

Replika. Rejhana Dervišević. Izvolte.

### **REJHANA DERVIŠEVIĆ – vijećnik Socijaldemokratske partije**

Hvala vam predsjedavajući. Sve, ovaj, takođe i ja srdačno pozdravljam. Ja ne bih ponavljala, otprilike kolega Bijedić je rekao ono što sam ja htjela da kažem.

Meni je zasmetalo, zasmetalo mi je izlaganje kolege iz SBB-a koji je Gradsku upravu nazvao na neki način indolentnom, odnosno njeno ponašanje kao indolentno.

Mislim da je bila vrlo kol, korisna diskusija kolege Ajanovića i kolege iz Alternative koji su podcrtali za one koji možda to ne uzimaju u obzir ili ne znaju. Zakon o javnim nabavkama, niz procedura i propisa i brojne okolnosti na koje ni na koji način ustvari ne može uticati Gradska uprava, a razloge za neizvršenje pojedinih stavki je vrlo jasno iznijela gospođa Isaković i ja se slažem da za šire izvještavanje javnosti treba dodati nešto detaljnije obrazloženje.

Dakle, ponovo ponavljamo i treba reći da, da je niz okolnosti, a samim tim uz, usvajanje rebalansa budžeta u, kra, na sjednici krajem aprila zaista onemogućio raspisivanje ovih svih nabavki koje je trebalo provesti. S toga dakle, et to je bila moja replika. Hvala.

### **MIREL MIŠKOVIĆ**

Zahvaljujem. Replika Elvir Kasumović. Izvolte.

### **ELVIR KASUMOVIĆ**

Kako moje izlaganje ne bi bilo pristrasno i upućeno protiv političke opcije ja ću iznijeti samo dva dobra primjera u Tuzlanskom kantonu načelnike Živinica i Lukavca.

### **MIREL MIŠKOVIĆ**

Zahvaljujem. Replika Elvir Bijedić. Izvolte.

## **ELVIR BIJEDIĆ**

Mislim ja da niko ovdje, ja ne znam zbog čega kolega Kusumović je pomenuo političke opcije, mi pričamo o izvršenju, vjerovatno svako ima u glavi ono na šta misli, ali dakle evo, dakle upoređivati strukture komunalno, odnosno komunalne infrastrukture i sve ostale, ovaj obim poslova, dakle s kojima se suočavaju službe u bilo kojoj opštini kantona i, i samog grada Tuzla, mislim da ovaj je potpuno besmisleno, mislim.

Ono sa čim se grad Tuzla susreće, sa kakvim problemima i sa kolikim prilivom stanovništva svakodnevno i sa kakvom infrastrukturom, mi znamo, ako već moram da pominjem, a mislim imali smo i, i prethodnih sjednica govora o tonjenju, toliko tih stvari da mislim, pominjati bilo kakve druge opštine upoređujući s Tuzlom mislim da je stvarno besmisleno. Hvala.

## **MIREL MIŠKOVIĆ**

Zahvaljujem. Replika Rejhana Dervišević. Izvolte.

## **REJHANA DERVIŠEVIĆ**

Ja se ponovo želim nadovezati na poređenja. Poređenja se vrše kad imate nešto slično i uporedivo. Porediti opštinu koja ima četrdeset mjesnih zajednica sa nekom koja nema niti deset, broj stanovnika i sve teškoće sa kojima se, koje su specifične za pojedine opštine, mislim da, da ovo nije dobronamjerna diskusija.

Dakle mi danas govorimo o raz, o izvještaju o izvršenju Budžeta. Nama je prezentirano na koji način, kako su se ovaj trošili novci koji izdvajaju građani, zašto nije došlo do realizacije, šta se planira, gdje je šta usvojeno, dakle i mislim da, da na ovoj sjednici po ovom pitanju ne treba prikupljati pojjene na način da se, kritika uvijek ima.

Uvijek može više, bolje, brže, efikasnije i tako dalje, kad čovjek sam od sebe krene. Hvala.

## **MIREL MIŠKOVIĆ**

Samo navedite kome upućujete repliku. Ne. Elvir Kasumović ima repliku i da kaže kome upućuje.

## **ELVIR KASUMOVIĆ**

Pa evo ja, obzirom da su onako pretežno odgovori bili unisoni, ja bi evo, repliku svima mojim predhodnicima. Mislim da trebamo ovdje hvaliti sve što je dobro i mi ni, nismo do sada imali nikakav problem.

Sve ono što je dobro uradila gradska uprava mi smo to u nekoliko na, navrata i pohvalili. Međutim, ono što nije dobro, što ne ide onim dogovorenim tempom i obećanim tempom izuzetno treba kудiti, kritikovati, jel smatramo da su i te kritike dobronamjerne i da će samo ubrzat i pospiješit uspješnost ove administracije.

Ako bilo ko misli da je bilo šta ovo usmjereno u nekom drugom kontekstu ili smjeru grdno se vara.

Ovo je samo usmjereno u kontekstu i smjeru interesa građana grada Tuzle kako bi, evo svi građani grada Tuzle imali, da kažem, jedan privilegovani status kakav imaju možda evo neke mjesne zajednice.

Znači, samo da idemo na neku ravnopravnost svih. Jel ne možemo reći da smo svi ravnopravni ako recimo u zimskom periodu neke ulice se ne čiste, ako nemamo odvoza smeća, a, u nekim ulicama, ako nemamo asfaltirane i dobro uređene asfaltne površine prema nekim naseljima i tako dalje.

Ne možemo reći da smo svi u, u, u, u istom jel ovaj košu. S tim u vezi ove kritike su evo da kažem dobronamjernog karaktera i samo želimo da ubrzamo procese koje ova administracija na neki način, ne znam iz kog razloga, ali je očigledno ne radi. Očigledno je na terenu da se nešto ne radi.

Moji primjeri iz drugih općina su navedeni samo u tom smjeru da se pita kako to oni rade? kako to oni mogu radit u tom vremenskom roku? Jel isti zakoni i na području tih općina su isti zakoni po pitanju građenja i tako dalje, kao i na području grada Tuzle.

Zbog čega dobre recepte ne bi preuzeli od nekoga drugog ko to radi dobro. Prema tome evo, ne, ne, nemam problem ni ja, kao ni, ni Savez za bolju budućnost da pohvalim ono što je sve dobro urađeno u interesu građana, ali isto tako ako nešto ne ide on, on, onom tendencijom i onim tempom koji je dogovoren i koji bi trebao da, da bude u tom smjeru realizovan, zbog čega to ne bi kritikovali.

Ili želite jednostavno svima ovdje da nam stavite neke flastere na usta, evo ako hoćete mi ćemo to sljedeći put uraditi sami, pa vi eto radite onda što se tiče vijeća. Zbog toga se i zovemo opozicija i uvijek ćemo kritikovati, ovo, ono što nevalja i što gradska uprava ne radi kako treba. Hvala.

## **MIREL MIŠKOVIĆ**

Zahvaljujem. Znači replicirati možete jednom, samo jednom vijećniku po istom pitanju. Evo ima li još neko? Replika. Al to vam je. Ne možete po istom pitanju. Ako je po drugom. Evo replika Mirza Tupajić da vidimo, da razriješi ovu situaciju.

## **MIRZA TUPAJIĆ**

Na zadnjoj sjednici Vijeća kad smo imali Kolegij, poslije završetka Vijeća dogovorili smo se da će ovo biti neka light ovaj sjednica Vijeća, međutim evo.

Mislim da vi niste ni svjesni kakvu trenutno imate opoziciju ovdje, sjednicu Gradskog vijeća, opoziciju koja ne želi da politizira, znači ovaj period, ovih jedno zadnjih šest mjeseci pred izbore, radi se o opštim izborima da se ne bi prenijelo na rad Gradskog vijeća i da bi imali ovdje razne pompe, razne dug, dugotrajne rasprave a sve u, u, u, u cilju pribavljanja nekih političkih poena.

Mi to iz opozicije, možda vi to ne primjetite ne želimo. I jako nekorektno ovo, os, onaj, ova rafalna paljba na mog kolegu Kasumovića koji ništa nije posebno ovaj loše, šta, šta je čovjek kazao, al vidim da je to ono rafalno na njegov.

Gospodo molim vas imate fine paušale, natočite pun rezervoar goriva i obidite malo naše lijepe Mjesne zajednice, pogotovu prigradske Mjesne zajednice.

Ja sam juče bio u Kiseljaku i u Pascima. Strašno. Polja su ambrozije. To je kao da je vrijeme stalo.

E vjerujte, pitajte tamo građane da li su zadovoljni sa izvršenjem budžeta, to jest sa raspodjelom novca, novca upravo tih građana. Nisu vjerujte, nisu zadovoljni.

Rad Gradske izvršne vlasti, rad pozicije u (MIREL MIŠKOVIĆ – Privodite repliku kraju.) Vijeću, samo da završim, neću se više ja.

Znači Gradske izvršne vlasti i poziciju u vijeću je toliko dobar koliko je dobra opozicija, to jeste ako ima aktivno opoziciju da korektno, znači kritikuje one neke propuste.

Gospodo ovo je demokratska zemlja i ne možete nekom uskraćivati pravo da, da da, da kritikuje i da vam bude to krivo. Hvala lijepo.

### **MIREL MIŠKOVIĆ**

Zahvaljujem. Replika Elvir Bijedić, SDP. Izvolte.

### **ELVIR BIJEDIĆ**

Zahvaljujem. Ma mislim. Da vam kažem opozicija je, evo ajde složiti ću se korektna, konstruktivna sve stoji, ali vjerovatno kada imate poziciju koja je isto tako, koja radi i koja je konstruktivna i ne vidim, ne nalazite način da bilo šta pronađete.

Dakle, kad je u pitanju, pa evo sad mislim i kontradiktorno je. Pričamo o Lukavcu, pričamo o Srebreniku, a o koliko mjesnih zajednica u Tuzli pričamo. Trebalo bi dobro natočiti rezervoar goriva.

U pravu ste gospodine Tupajiću. Znači radi se o velikom površini, velikom broju stanovnika i sigurno da te stvari da ravnomjieran razvoj treba zastupiti.

Niko nikome ovdje, bože sačuvaj neće lijepiti, niti učutkavat. Ja ne vidim, ja ne znam da li, ko je stekao dojam da neko nekom ovdje brani da priča. Ja sam upravo stekao drugi dojam, da Kolega Kasumović je imao repliku više, tako da, evo ako smo iz ovog izvukli neki zaključak, onda je to to. Zahvaljujem se.

### **MIREL MIŠKOVIĆ**

Zahvaljujem. Repliku ima Rejhana Dervišević, SDP. Izvolte.

### **REJHANA DERVIŠEVIĆ**

Hvala vam. Replika je kolegi Tupajiću. Dakle sve dobro namjerne kritike su dobro došle i one mogu samo unaprijediti, znači ovaj i naš rad, rad u društvenoj zajednici, kako pojedinca, tako i više osoba, skupina i tako dalje.

Znači nije se radilo o rafalnoj paljbi i ja vas molim da ubuduće te ratne izraze ne koristite.

Možemo reći da smo se osvrnuli možda u, u, u svojim o, na diskusiju kolege, a to drugo je doista bilo neprimjerno. Hvala.

### **MIREL MIŠKOVIĆ**

Zahvaljujem. Replika Alen Kapidžić. Izvolte. SDP.

### **ALEN KAPIDŽIĆ**

Hvala predsjedavajući. Pa, evo samo što, već je spomenuto jel. Znači niko ovdje, stvarno nikog ne želi da učutka kako kažu iz opozicije da im stavimo flaster na usta. Jel, jel, moje pitanje je njima jel oni žele da mi kao pozicija stavimo flaster na usta.

Očigledno, znači trebamo šuti na kritike, jel, ne možemo šutiti na nešto što nije opravdano. Hvala.



## MIREL MIŠKOVIĆ

Dobro. Zahvaljujem. Zaključujem raspravu klubova vijećnika. Otvaram raspravu vijećnika. Prvi za riječ se javio Mensur Alić, vijećnik Tuzlanske alternative. Izvolte.

### MENSUR ALIĆ – vijećnik Tuzlanske alternative

Pa evo, sve vas srdačno pozdravljam. Ja ću ovako započeti, nisam mislio ovom rečenicom krenuti, ali posljednja diskusija gdje je rečeno da ima, ima, imamo velike paušale i da trebamo natočiti gorivo, bil, da obiđemo Mjesne zajednice.

Bilo bi dobro da ovu danas sjednicu nikako nismo održali i ona nije bila potrebna uopšte da se drži.

Danas smo zajedno sa komisijama potrošili najmanje 50.000 KM, a ovo govorim zbog građana, jer se mnogi udaraju u prsa. Tih 50.000 mogli smo uložiti u neki projekat.

Ova sjednica nam nije trebala uopšte danas, jer smo imali dvije vanredne sjednice koje su bile plaćene. Avgustu, avgustu sjednicu nismo trebali držati uopšte.

Ova, ovaj izvještaj mogao se čak i u oktobru razmatrati, jer po zakonu kaže svaka tri mjeseca.

Već je prošlo šest mjeseci. Prema tome nije prošlo devet. Prema tome, ali evo na čast onima koji su tražili da se mora održati ova sjednica, a toliko imamo sad kritika na ovaj izvještaj.

Ja se slažem da opozicija ima svoje, svoje mišljenje i treba da ga ima. Ne bi valjalo kad ga ne bi imala, svoje mišljenje i svoju kritiku, al ta kritika mora biti usmjerena tačno ondje gdje je opravdana.

Ja ću navesti samo, da Zakon o javnim nabavkama je totalno loš. Namjerno ga neće da izmijene oni koji su danas na vlasti.

Da su htjeli imali su četiri godine vremena da ga zamijene, da ga promijene. Ima grupa tamo koja je, ovaj, formirana da radi i to nevladine organizacije, da se izmijeni Zakon o nabavkama ne bi danas bili u situaciji ovakvoj kakvoj jesmo kad su u pitanju projekti.

Navešću samo primjer. Stadio Tušanj, kad je traženo, traženo projekat, tender raspisan za projekat. Pojavila se firma iz Banja Luke. Ovo gov, govorim samo zbog građana da znaju šta je i kako idu procedure, koja je ponudila trista puta jeftiniji izradu projekta na, na tenderu od drugoplasirane firme. Naravno da po Zakonu o javnim nabavkama morali ste udijeliti tom proizvođaču. Projekat je urađen.

Taj projekat kad je otišao na Reviziju nije ni za šta. Ne, ne može ni krenuti sa temeljima.

I nama zbog takvih stvari stoji stadion, ne možemo da ga radimo zbog toga jer se mora sad, mora se poništiti, mora se ovaj da odustane, plati mu sve ono, što, sve da mu se plati, plaćeno mu, samo da odustane da bi se drugi, sad se mora raspisati ponovo tender za novi projekat kako i mi izgubismo dvije godine na stadionu, a svake godine u budžetu mi izdvojimo sredstva za, da bi mogli stadion raditi. To građani ne znaju.

Tako, evo navešću drugi primjer. Imamo primjer, evo gradi se, renovira se dio Banje. Imate ono stepenište, pogledajte molim vas. Neka je firma dobila, ne znam koja je, ja stalno tu prolazim i gledam to, muči mi se, smuči mi se, vjerujte da bi uzeo motku ujutro, došao ondje i rastjerao ona dva, tri radnika koji dođu da to rade, al on je dobio na tenderu.

Tri mjeseca još nisu završili. Sezona turistička prolazi, građani se smiju, ne znaju građani zbog čega je to. Ne možeš s njim raskinuti ugovor, ne možeš ništa, a on ne radi svoj posao. Nema, to, to su ti, to je zakon koji ti moraš ispoštovati.

Niko u Gradskoj upravi i nikom ne bi poželio da radi mimo zakona da bi nešto, nešto se brzo završilo.

Drugo, mi smo u budžetu, kad smo usvajali budžet za 2018. godinu, smo usvojili i projekte koje treba realizovati u ovoj godini.

Na kraju godine, kad bude izvještaj za čitavu godinu 2017-tu, 2018. godinu, vidjet ćemo i obrazloženje da li su ti projekti svi urađeni, koji smo svi glasali ovdje na vijeću, da li nisu i zbog čega nisu urađeni? da bude obrazloženje ono što, upravo što je kolega Mirnes govorio, da bude obrazloženje zbog čega taj projekat koji smo mi usvojili nije urađen.

Treća stvar koju imamo mi ovdje. Mi donesemo budžet, usvojimo ga i onda punimo čitavo 12 mjeseci inicijativama ovo vijeće da bi glasalo za neke projekte koji nisu opšte isplanirani u budžetu da se rade.

Mi, bila je jedna inicijativa na samom početku jutros, gdje kaže građani su spremni da za neki put da daju sredstva da se radi. Pa ne može se raditi tako. Zašto imamo Gap komisiju. Šta ona radi?

Pa ima ona tamo boduje svaki projekat. Jel taj projekat, jel taj put tamo se apliciro, jesu li rekli građani da će sredstva dodijeliti, jel po cijenu, u kojem vremenskom periodu će se raditi.

Mi nabacamo inicijativa ovdje, treba raditi ulicu, treba ovdje, treba ovo, a nema nigdje nismo sredstva planirali u Budžetu za 2018. godinu. Ne možemo. (MIREL MIŠKOVIĆ – Halo. Ovaj. Nemojte prekidat.) Ja ako sam. Ja ako. Ako je vrijeme. Nije. Ne, ne, ne nerviram se uopšte. Ne, ne. Jer ja sam jako zdrav čovjek sad. Jako, jako zdrav čovjek. Povratak otpisanih. To je najveći, najveći. Tako da, hvala ti, hvala ti Mirnese, ali nemoj se ništa, odličan sam ja. Ja. Malo samo ton ovaj. Nije, nije, nije mene uhvatilo. Ja malo sam gori kad mi se, kad mi se, kad me uhvati.

Ali govorim, ja govorim samo istinu. Ja govorim iz duše, iz srca ovo što govorim i zbog toga je moj ton takav. Ja govorim istinu. Kad čovjek govori istinu onda mora malo da i adrelin mu proradi tako kad priča (MIREL MIŠKOVIĆ – Emocija.)

I još nešto, Mirnes me prekinuo, ali, evo zaključak je dobar Mirnes koji je predložio. Hoće li, ova vlast to neće uraditi sigurno, nema ni vremena, jer se neće više ni sastajati do kraja mandata, ali da na sljedećoj vlasti mi moramo postaviti (MIREL MIŠKOVIĆ – Incirat.) inicijativu za izmjenu zakona, pod hitno Zakon o, o javnim nabavkama.

Jedino je to izlaz i tad ćemo imati sve projekte na vrijeme urađene i imat ćemo i hvala bogu opet da je ovaj Budžet stabilan, to je najvažnije. Najvažnije je da je Budžet stabilan i da ima sredstava.

A zakon što nas, i naravno da mora, moramo i to da, da shvatimo da smo mi imali veliku reorganizaciju u gradskoj upravi. Ne možemo mi sad očekivat od pomoćnika načelnika za komunalne poslove koji je prije par mjeseci žena došla, da sad može sve odjedanput to uraditi sve što nije, možda je i urađeno, ali evo ide korak po korak.

Doći će na svoje mjesto i mislim da budućnost je pred nama i da će oni to radit kako valja. Evo zahvaljujem i mislim da nisam vrijeme prešao.

## **MIREL MIŠKOVIĆ**

Niste. Zahvaljujem. Replika Elvir Kasumović, SBB. Izvolte.

## **ELVIR KASUMOVIĆ**

Ja bih ovo nazvao pozitivnom replikom, obzirom da stoji sve što je gospodin, moj evo uvaženi kolega Mensur Alić rekao. S tim u vezi me nešto ganulo, ako može samo da

nastavim. Kada je gospodin Alić rekao da za tri mjeseca nisu urađene stepenice, jel sezona prolazi i tako dalje.

Evo ja vas pitam sad gospodo. Sjećate se moje inicijative da se postave dvije table na dva strana jezika na Kapiji. Jel to bilo teško za šest, sedam, osam, il deset mjeseci kad je, a evo turistička sezona je prošlo.

Hiljade turista je došlo tu. Hiljade priča je moglo otić u svijet kako je dana tog i tog ubijena tuzlanska mladost i tako dalje. Da se to prenese u svijet. Zar je bilo to teško? Evo o tome pričam.

I naravno i mi smatramo da su, da zakoni nisu dobri, da su zakoni, jel, kako već neki nazivaju nakaradni i tako dalje. Pa evo uzmite samo Izborni zakon. Evo zahvaljujući Izbornim zakonu neki ovdje sjede, ne zahvaljujući volji građana, nego zahvaljujući zakonu. Jel to u redu?

Pa zbog čega se provode izbori kad ljudi, kad ih zakon dovodi ovdje u Vijeće ili u skupštine i tako dalje. (MIREL MIŠKOVIĆ - Vratite se na temu samo.) Hvala. Završio sam.

## **MIREL MIŠKOVIĆ**

Zahvaljujem. Replika Elvir Bijedić. Izvolte.

## **ELVIR BIJEDIĆ**

Ma, ma neću dugo, ovaj, razumijem kolegu Kasumovića. Samo bih se vratio, da ne idemo od teme. Znači ovdje razmatramo izvještaj o izvršenju Budžeta Grada Tuzla za period 01. 01. do 30. 06.

Znači ne razmatramo inicijative koje je Klub SBB-a podnio. Znači vrlo je bitno da napravimo tu razliku, da ne miješamo samo kruške i jabuke. Eto toliko. Hvala.

## **MIREL MIŠKOVIĆ**

Dobro. Zahvaljujem. Za riječ se javio Elvir Mahmuzić, vijećnik SDP-a. Izvolte.

## **ELVIR MAHMUZIĆ – vijećnik Socijaldemokratske partije**

Zahvaljujem predsjedavajući. Pozdravljam sve prisutne, iako sam vas sve pozdravio na hodniku, ali nema veze.

Nisam htio se javljat i replicirat o opoziciji na njihovim izraženim stavovima, žaljenjima, jer ja smatram da svako ima pravo i opozicija da kaže ono što misli. Naravno, opozicija mora da zna da zdrava pozicija će odgovoriti i neće štititi na neke stvari koje, za koje smatra da nisu tačne i da su insinuacije.

Ja smatram da mi danas imamo pred sobom jedan važan dokument, a to je izvještaj o izvršenju Budžeta za proteklu polovinu ove 2018. godine. Imamo jedno kratko obrazloženje.

Dakle kratko obrazloženje je na šest stranica ako se ne varam, ili osam, pardon, a Izvještaj o izvršenju budžeta se nalazi na nekih sedamdeset i četiri stranice, od toga sedamdeset tri stranice tabelarni prikazi Izvještaja o izvršenju budžeta.

Uz dužno poštovanje, ja danas nisam uspio da čujem, očekivao sam bar opozicija da će jedno deset projekata, jer pričaju nije realizovan projekat ovaj, onaj, da su se makar dogovorili, pa rekli deset nekih projekata koji nisu realizovani, nego sam čuo onako, asfaltne baze u nekim tamo ulicama, Kiseljak, Pasci, ambrozija, dvije table, evo, možda se opozicija to

nije sjetila, al, al sam smatrao za shodno da, da će se naći neki projekti i da će se lijepo reći šta to nije realizovano i zbog čega.

Ja mislim kolega Mirnese da se bez obzira koliko dobro obrazloženje bilo nekog izvještaja, mislim kad je predizborna kampanja to pada u vodu.

Ja mislim da se ovdje radi o jednoj predizbornoj utrci. Da i opozicija razumijemo mora nešto reći kako bi možda prikupila simpatije kod građana, ali smatram da, da velika većina onoga što je izneseno nije, nije tačno. To dakle nije ni po, potkrijepljeno nekim argumentima i činjenicama o kojima sam maloprije govorio.

Mi smo svi svjesni da imamo svoje porodice i jednostavno neke kućne, kućni budžet i naravno planiramo i prihode i rashode. I evo jedan banalan primjer, nekako sam se sjetio.

Dogovorite se sa suprugom ili suprugom da krećite u maju stan. Imate određena sredstva da li to bilo 100, 150, 200 maraka. Dogovorite s majstorom u februaru da će te raditi u maju, dođe maj, razbolio se majstor, otišao na godišnji, zaboravio i tako dalje, a vi se dogovorili, pružili ruku, pa možda dali i neku kaparu.

Gdje su tu sankcije? Može vas jedino žena napasti da kaže kako si neodgovoran, nisi ispoštovao, al sumnjam, ili muž, moram zadovoljit ovaj džender.

Dakle, ne možemo o, o, ono što je poenta moje priče da nekad ne možemo naravno da, da, da u tančine planiramo rashode, pogotovu ukoliko, ukoliko imamo neka pravila koja moramo naravno poštovati, jer zakon je ono što se mora poštovati, ma kakav je on napisan, a tu su poslanici da ga mijenjaju. Dakle, to je jedino ono što možemo uraditi.

Činjenica je da je Zakon o javnim nabavkama u tom dijelu kada su u pitanju rokovi, ja se slažem da bi trebalo pokrenut neku inicijativu u smislu izmjena zakona, mada sumnjam da će oni to sjesti, još pogotovo kad vide inicijativu Gradskog vijeća Tuzla da će oni to sjesti i izmijenit. Da su htjeli izmjenit izmijenili bi ga.

Dakle ograničava mogućnost nekome da izvrši posao. Jedina garancija koju Ugovorni organ ima, a Ugovorni organ je evo grad, jeste u zakonu da traži prilikom raspisivanja tendera garancija za izvršenje usluga, radova ili isporuku roba.

Dakle, to je jedina garancija. A šta to podrazumijeva? To podrazumijeva da ukoliko vas prevari određeni izvođač radova, da vi možete naplatiti to, ali međutim šta se dešava. Ako je to u pitanju neki put, ako je u pitanju nešto što je u krucijalnoj važnosti, šta vama znači naplatiti od te garancije ukoliko se taj put ne asfaltira.

Dakle, činjenica da postoje te prepreke. Ja se nadam da će u narednom periodu, da se ozbiljno razmišljati o tome da se ide u izmjenu tog Zakona o javnim nabavkama koji bi olakšao dakle procedure.

Vi imate situaciju da je također jedna vrsta garancije u odnosu na, na stari Zakon o javnim nabavkama, a to je uplata taksi prilikom žalbi.

U vrijed, do vrijednosti ugovora do 50.000 maraka žalba je, moraš platiti 500 maraka. Šta je to jakoj firmi pet stotina maraka da obustavi neki tender, ili da možda produži rok, da iskoristi pravo žalbe kako se ne bi nešto izvršilo.

Dakle imamo 500 maraka, 800 maraka i na kraju do vrijednosti ugovora 9.000.000, 10.000 maraka, al govorim srazmjerno na neke kompanije koje su mnogo jake i moćne, šta je to nekom izdvojiti 500 maraka za, za tu žalbu.

Dakle, može se i tu razmišljati da se povećaju te takse pa da ovaj dobro razmisli kad hoće da podnese žalbu da, da, vjerujte mi, krećem se, naravno svako ima pravo na žalbu i u to ne ulazim.

Međutim, zašto sam ovo rekao, krećem se s nekim ljudima i razgovoram širom Bosne i Hercegovine gdje su mi neke primjere da li, dat da čak neke političke stranke znaju namjerno obstruirat izvođenjem nekih radova preko neke firme, pa samo da se produži rok, a prije su žalbe bile po tri četiri mjeseca, to je se, to se znalo čekat, da na kraju krajeva padne

tender ili da se produži žalbeni rok na ti, na ta tri, četiri mjeseca što utiče na to da se ne može neki rad izvršiti.

Evo s ovim ću završit. Dakle, mislim da je, da, da trebamo svi nekako sabrano i zrele, zrelog nekog razmišljanja da, naravno svako ima pravo na, na da glasa il ne glasa za ovaj izvještaj, ali mislim da, da, da nema potrebe da, da idemo u toliko detaljisanje nečeg o čemu nismo puno ni iznijeli nekih dokaza i argumenata. Hvala.

## **MIREL MIŠKOVIĆ**

Dobro. Zahvaljujem. S obzirom da nema više vijećnika prijavljenih za diskusiju zaključujem raspravu.

Sada stavljam na izjašnjavanje izvještaj o izvršenju Budžeta Grada Tuzla za period od 01. 01. 2018. godine do 30. 06. 2018. godine i pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Glasanje je okončano.

Konstatujem da je Izvještaj o izvršenju Budžeta Grada Tuzla za period 01. 01. do 30. 06. 2018. godine, usvojen većinom glasova, 21 vijećnik je glasao za, nije bilo glasova protiv i 6 vijećnika je bilo suzdržano.

Pozivam sada Slađanu Krajinu, sekretara Gradskog vijeća, da pročita zaključke koji su proizašli iz rasprave.

Molim Mahmuzića da isključi mikrofon, il Azru.

## **SLAĐANA KRAJINA - sekretar Gradskog vijeća Tuzla**

Gradsko vijeće Tuzla traži od predlagača i obrađivača Izvještaja o izvršenju Budžeta, da se ubuduće, prilikom dostavljanja izvještaja o izvršenju budžeta Grada Tuzla, u obrazloženju izvještaja detaljnije navedu i obrazlože razlozi neutroška sredstava, naročito kada ta sredstva nisu utrošena zbog nerealizacije pojedinih projekata.

Traži se od resornih gradskih službi da u daljoj realizaciji projekata vrše adekvatan nadzor nad prijemom i raspodjelom novčanih sredstava, kako se ne bi desilo da dođe do kašnjenja u realizaciji projekata.

Gradsko vijeće Tuzla takođe traži od predlagača i obrađivača da se, tamo gdje nije bilo moguće predvidjeti i planirati adekvatna novčana sredstva, što prije predvidi rebalans Budžeta, kako bi se sve predviđene i planirane budžetske namjene mogle realizovati.

Gradsko vijeće Tuzla će pokrenuti inicijativu za izmjenu Zakona o javnim nabavkama, te u tom smislu traži od resornih službi da, u saradnji sa javnim preduzećima i javnim ustanovama čiji je osnivač ili suosnivač Grad Tuzla, pripreme tekst inicijative, na način da svaki od njih, u okviru svoje nadležnosti, pripremi kvalitetne prijedloge za izmjenu Zakona u dijelu u kojem je, u praksi, ovaj Zakon pokazao određene manjkavosti (Prijedlozi da se skrate rokovi za podnošenje žalbi, da se skrate rokovi rješavanja po žalbama, razmotri mogućnost oštrijeg kažnjavanja lica koji svojim postupcima namjerno odugovlače procedure javne nabavke.).

Gradsko vijeće Tuzla sugerše gradskim službama i drugim organima na koje se odnosi realizacija izvršenja Budžeta da, odmah po usvajanju budžeta, ukoliko je to moguće, pokrenu procedure nabavke roba i usluga, kako bi se i na taj način smanjili periodi potrebni za obezbjeđenje svih potrebnih uslova za javnu nabavku roba i usluga.

**MIREL MIŠKOVIĆ**

Dobro. Zahvaljujem. Sada stavljam. Dopuna zaključaka. Mirnes Ajanović. Izvolte.

**MIRNES AJANOVIĆ**

Samo ovaj dio, kada budu ove izmjene, ja sam ostao, ako se može, eh, može nekako ubaciti, osim u situacijama da, da se izbjegava primjena Zakona o javnim nabavkama, ono gdje sta. Znači da javna preduzeća, javne ustanove predlože to, osim u situacijama da se izbjegava primjena.

Da ne bi se desilo da neko kaže, kao što su govorili, mi hoćemo da se oslobodimo zakona. Et samo da se dopuni tim dijelom, a ovo ostalo je vrlo korektno.

**MIREL MIŠKOVIĆ**

Dobro. Zahvaljujem. Dopunu zaključaka Mensur Alić, Tuzlanska alternativa. Izvolte.

**MENSUR ALIĆ**

Samo još da dodate tamo da uz saradnju i mišljenje Udruženja poslodavaca Tuzle, pošto već udruženje je osnovano prije par mjeseci, tako da i oni daju svoje mišljenje na ovaj zaključak. Hvala.

**MIREL MIŠKOVIĆ**

OK. Zahvaljujem. Sada stavljam na izjašnjavanje zaključke, uz navedene dopune koje je pročitala sekretar Gradskog vijeća i pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Glasanje je okončano.

Konstatujem da su zaključci, koje je pročitala sekretar Gradskog vijeća, usvojeni sa 27 vijećnika su glasali za, nije bilo protiv, ni suzdržanih glasova.

- Gradsko vijeće Tuzla traži od predlagača i obrađivača izvještaja o izvršenju budžeta, da se ubuduće, prilikom dostavljanja izvještaja o izvršenju budžeta Grada Tuzla, u obrazloženju izvještaja detaljnije navedu i obrazlože razlozi neutroška sredstava, naročito kada ta sredstva nisu utrošena zbog nerealizacije pojedinih projekata.

- Traži se od resornih gradskih službi da u daljoj realizaciji projekata vrše adekvatan nadzor nad prijemom i raspodjelom novčanih sredstava, kako se ne bi desilo da dođe do kašnjenja u realizaciji projekata.

- Gradsko vijeće Tuzla takođe traži od predlagača i obrađivača da se, tamo gdje nije bilo moguće predvidjeti i planirati adekvatna novčana sredstva, što prije predvidi rebalans budžeta, kako bi se sve predviđene i planirane budžetske namjene mogle realizovati.

- Gradsko vijeće Tuzla će pokrenuti inicijativu za izmjenu Zakona o javnim nabavkama ("Službeni glasnik Bosne i Hercegovine", broj 39/14.) te u tom smislu traži od resornih službi da, u saradnji sa drugim gradskim službama, javnim preduzećima i javnim ustanovama čiji je osnivač ili suosnivač Grad Tuzla, (osim u situacijama kada se izbjegava primjena ovog Zakona) te u saradnji i uz mišljenje Udruženja poslodavaca Grada Tuzla, pripreme tekst inicijative, na način da svaki od njih, u okviru svoje nadležnosti, pripremi kvalitetne prijedloge izmjena Zakona o dijelu u kojem je, u praksi, ovaj Zakon pokazao određene manjkavosti (prijedlozi da se skrate rokovi za podnošenje žalbi, da se skrate rokovi

rješavanja po žalbama, razmotri mogućnost oštrijeg kažnjavanja lica koji svojim postupcima namjerno odugovlače procedure javne nabavke).

- Gradsko vijeće Tuzla sugeriše gradskim službama i drugim organima na koje se odnosi realizacija izvršenja budžeta da, odmah po usvajanju budžeta, pokrenu procedure nabavke robe i usluga, kako bi se i na taj način smanjili periodi potrebni za obezbjeđenje potrebnih uslova za javnu nabavku roba i usluga.

Prelazimo na treću tačku dnevnog reda.

## **IZVJEŠTAJ KOMISIJE ZA IZBOR I IMENOVANJA**

Pozivam sekretara Gradskog vijeća da pročita Izvještaj Komisije za izbor i imenovanja sa sjednice održane 28. 08. 2018. godine.

### **SLAĐANA KRAJINA**

Na osnovu člana 30. a u vezi sa članom 35. Poslovnika Gradskog vijeća Tuzla ("Službeni glasnik Grada Tuzla" broj 9/17. i 2/18.), Komisija za izbor i imenovanja sa sjednice održane 28. 08. 2018. godine podnosi Gradskom vijeću Izvještaj:

1. Komisija za izbor i imenovanja je razmatrala Prijedlog Kluba vijećnika BOSS - Bosanske stranke za izmjenu člana Komisije za izbor i imenovanja te je jednoglasno usvojila zaključak:

Komisija za izbor i imenovanja je razmatrala i prihvata Prijedlog Kluba vijećnika BOSS - Bosanske stranke za izmjenu člana Komisije za izbor i imenovanja, te predlaže Gradskom vijeću Tuzla da se:

- Mirela Halilović razriješi dužnosti člana Komisije za izbor i imenovanja,
- Mirsada Baraković izabere na dužnost člana Komisije za izbor i imenovanja.

2. Komisija za izbor i imenovanja je razmatrala Prijedlog Kluba vijećnika Stranke demokratske akcije za izmjenu članova radnih tijela u Gradskom vijeću, te je sa 4 glasa za i 1 glasom protiv usvojila slijedeći zaključak:

Komisija za izbor i imenovanja je razmatrala i prihvata Prijedlog Kluba vijećnika Stranke demokratske akcije za izmjenu članova radnih tijela u Gradskom vijeću Tuzla te predlaže Gradskom vijeću Tuzla da se:

- Enesa Alić razriješi dužnosti predsjednika Komisije za jednakopravnost polova,
- Zineta Čohadarević izabere na dužnost predsjednika Komisije za jednakopravnost polova,
- Nermina Beganović razriješi dužnosti člana Komisije za jednakopravnost polova,
- Maja Hrnčić izabere na dužnost člana Komisije za jednakopravnost polova,
- Fahrudin Budimlija razriješi dužnosti člana Komisije za zaštitu prava nacionalnih manjina,
- Faruk Hrustanović izabere na dužnost člana Komisije za zaštitu prava nacionalnih manjina,
- Asim Hadžiselimović razriješi dužnosti člana Komisije za izbor i imenovanja,
- Alija Begtašagić izabere na dužnost člana Komisije za izbor i imenovanja,
- Amir Bašić razriješi dužnosti člana Komisije za predstavke i prijedloge,
- Emir Razić izabere na dužnost člana Komisije za predstavke i prijedloge,
- Naida Morić razriješi dužnosti člana Komisije za kulturu i očuvanje kulturno-historijskog i prirodnog naslijeđa,

- Džanan Kušljagić izabere na dužnost člana Komisije za kulturu i očuvanje kulturno-historijskog i prirodnog naslijeđa.

3. Komisija za izbor i imenovanja je razmatrala Prijedlog Kluba vijećnika Stranke demokratske akcije za izmjene u savjetima mjesnih zajednica, te je sa 4 glasa za i 1 glasom protiv usvojila slijedeći zaključak:

Komisija za izbor i imenovanja je razmatrala i prihvata Prijedlog Kluba vijećnika Stranke demokratske akcije za izmjene u savjetima mjesnih zajednica, te predlaže Gradskom vijeću Tuzla da se:

- Alija Begtašagić razriješi dužnosti člana Savjeta Mjesne zajednice Mejdan,
- Amira Mujagić izabere na dužnost člana Savjeta Mjesne zajednice Mejdan,
- Nermin Kušljagić i Almir Terzić razriješe dužnosti člana Savjeta Mjesne zajednice Gornja Tuzla,
- Sanela Jasenčić i Redžo Alić izaberu na dužnost člana Savjeta Mjesne zajednice Gornja Tuzla,
- Fahir Kunić razriješi dužnosti člana Savjeta Mjesne zajednice Mosnik,
- Almasa Begić izabere na dužnost člana Savjeta Mjesne zajednice Mosnik,
- Sanela Gulamović i Anes Đulović razriješe dužnosti člana Savjeta Mjesne zajednice Brčanska Malta,
- Zekerijah Saltović i Amir Avdić izaberu na dužnost člana Savjeta Mjesne zajednice Brčanska Malta,
- Faruk Hrustanović i Eldin Karić razriješe dužnosti člana Savjeta Mjesne zajednice Slavinovići,
- Aldin Ismić i Muhamed Trgovčević izaberu na dužnost člana Savjeta Mjesne zajednice Slavinovići,
- Alem Džananović razriješi dužnosti člana Savjeta Mjesne zajednice Kiseljak,
- Enver Mehmedinović izabere na dužnost člana Savjeta Mjesne zajednice Kiseljak,
- Zineta Čohadarević razriješi dužnosti člana Savjeta Mjesne zajednice Pasci Gornji i
- Zijad Đulović izabere na dužnost člana Savjeta Mjesne zajednice Pasci Gornji.

## **MIREL MIŠKOVIĆ**

Zahvaljujem sekretaru Gradskog vijeća. Otvaram raspravu klubova vijećnika. Ima li neko da se javlja za riječ? Nema. Zatvaram raspravu klubova vijećnika. Otvaram raspravu vijećnika. Javlja li se neko za riječ? Ne javlja. Zatvaram raspravu vijećnika.

Sad pozivam Slađanu Krajinu, sekretara Gradskog vijeća, da pročita prijedlog Komisije za izbor i imenovanja, na inicijativu Kluba vijećnika BOSS - Bosanske stranke, za izmjenu člana Komisije za izbor i imenovanja, sa sjednice održane 28. 08. 2018. godine.

## **SLAĐANA KRAJINA**

Komisija za izbor i imenovanja je razmatrala i prihvata Prijedlog Kluba vijećnika BOSS - Bosanske stranke za izmjenu člana Komisije za izbor i imenovanja, te predlaže Gradskom vijeću Tuzla da se:

- Mirela Halilović razriješi dužnosti člana Komisije za izbor i imenovanja,
- Mirsada Baraković izabere na dužnost člana Komisije za izbor i imenovanja.

## **MIREL MIŠKOVIĆ**

Sada stavljam na izjašnjavanje prijedlog Komisije za izbor i imenovanja, na inicijativu



Kluba vijećnika BOSS - Bosanske stranke, za izmjenu člana Komisije za izbor i imenovanja, koji je pročitala Sekretar Gradskog vijeća Tuzla i pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Glasanje je okončano.

Konstatujem da je Gradsko vijeće Tuzla većinom glasova prihvatilo prijedlog Komisije za izbor i imenovanja, na inicijativu Kluba vijećnika BOSS - Bosanske stranke, 26 vijećnika su glasali za, nije bilo protiv i 1 vijećnik je bio suzdržan, te se:

- Mirela Halilović razrješava dužnosti člana Komisije za izbor i imenovanja,
- Mirsada Baraković bira na dužnost člana Komisije za izbor i imenovanja.

Idemo dalje. Pozivam Slađanu Krajinu, sekretara Gradskog vijeća da pročita prijedlog Komisije za izbor i imenovanja, na inicijativu Kluba vijećnika Stranke demokratske akcije, za izmjenu članova radnih tijela u Gradskom vijeću Tuzla, sa sjednice održane 28. 08. 2018. godine.

### **SLAĐANA KRAJINA**

Komisija za izbor i imenovanja je razmatrala i prihvata Prijedlog Kluba vijećnika Stranke demokratske akcije za izmjenu članova radnih tijela u Gradskom vijeću Tuzla, te predlaže Gradskom vijeću Tuzla da se:

- Enesa Alić razriješi dužnosti predsjednika Komisije za jednakopravnost polova,
- Zineta Čohadarević izabere na dužnost predsjednika Komisije za jednakopravnost polova,
- Nermina Beganović razriješi dužnosti člana Komisije za jednakopravnost polova,
- Maja Hrnčić izabere na dužnost člana Komisije za jednakopravnost polova,
- Fahrudin Budimlija razriješi dužnosti člana Komisije za zaštitu prava nacionalnih manjina,
- Faruk Hrustanović izabere na dužnost člana Komisije za zaštitu prava nacionalnih manjina,
- Asim Hadžiselimović razriješi dužnosti člana Komisije za izbor i imenovanja,
- Alija Begtašagić izabere na dužnost člana Komisije za izbor i imenovanja,
- Amir Bašić razriješi dužnosti člana Komisije za predstavke i prijedloge,
- Emir Razić izabere na dužnost člana Komisije za predstavke i prijedloge,
- Naida Morić razriješi dužnosti člana Komisije za kulturu i očuvanje kulturno-historijskog i prirodnog naslijeđa,
- Džanan Kušljugić izabere na dužnost člana Komisije za kulturu i očuvanje kulturno-historijskog i prirodnog naslijeđa.

### **MIREL MIŠKOVIĆ**

Zahvaljujem. Sada stavljam na izjašnjavanje prijedlog Komisije za izbor i imenovanja, na inicijativu Kluba vijećnika Stranke demokratske akcije za izmjene članova radnih tijela u Gradskom vijeću Tuzla, koji je pročitala Sekretar Gradskog vijeća Tuzla i pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Zahvaljujem. Glasanje je okončano.

Konstatujem da je za ovaj prijedlog Komisije za izbor i imenovanja, na inicijativu Kluba vijećnika Stranke demokratske akcije, 8 vijećnika je glasalo za, 3 vijećnika je bilo protiv i 16 suzdržanih glasova, tako da prijedlog Komisije za izbor i imenovanja, na

inicijativu Kluba vijećnika Stranke demokratske akcije za izmjene članova radnih tijela Gradskog vijeća Tuzla, nije dobio potrebnu većinu.

Idemo dalje. Pozivam sekretara Gradskog vijeća da pročita prijedlog Komisije za izbor i imenovanja, na inicijativu Kluba vijećnika Stranke demokratske akcije, za izmjenu članova savjeta mjesnih zajednica, sa sjednice održane 28. 08. 2018. godine.

## **SLAĐANA KRAJINA**

Komisija za izbor i imenovanja je razmatrala Prijedlog Kluba vijećnika Stranke demokratske akcije za izmjene u savjetima mjesnih zajednica te je sa 4 glasa za i 1 glasom protiv usvojila slijedeći zaključak:

Komisija za izbor i imenovanja je razmatrala i prihvata Prijedlog Kluba vijećnika Stranke demokratske akcije za izmjene u Savjetima Mjesnih zajednica, te predlaže Gradskom vijeću Tuzla da se:

- Alija Begtašagić razriješi dužnosti člana Savjeta Mjesne zajednice Mejdan,
- Amira Mujagić izabere na dužnost člana Savjeta Mjesne zajednice Mejdan,
- Nermin Kušljugić i Almir Terzić razriješe dužnosti člana Savjeta Mjesne zajednice Gornja Tuzla,
- Sanela Jasenčić i Redžo Alić izaberu na dužnost člana Savjeta Mjesne zajednice Gornja Tuzla,
- Fahir Kunić razriješi dužnosti člana Savjeta Mjesne zajednice Mosnik,
- Almasa Begić izabere na dužnost člana Savjeta Mjesne zajednice Mosnik,
- Sanela Gulamović i Anes Đulović razriješe dužnosti člana Savjeta Mjesne zajednice Brčanska Malta,
- Zekerijah Saltović i Amir Avdić izaberu na dužnost člana Savjeta Mjesne zajednice Brčanska Malta,
- Faruk Hrustanović i Eldin Karić razriješe dužnosti člana Savjeta Mjesne zajednice Slavinovići,
- Aldin Ismić i Muhamed Trgovčević izaberu na dužnost člana Savjeta Mjesne zajednice Slavinovići,
- Alem Džananović razriješi dužnosti člana Savjeta Mjesne zajednice Kiseljak,
- Enver Mehmedinović izabere na dužnost člana Savjeta Mjesne zajednice Kiseljak,
- Zineta Čohadarević razriješi dužnosti člana Savjeta Mjesne zajednice Pasci Gornji i
- Zijad Đulović izabere na dužnost člana Savjeta Mjesne zajednice Pasci Gornji.

## **MIREL MIŠKOVIĆ**

Zahvaljujem sekretaru Gradskog vijeća. Sada stavljam na izjašnjavanje prijedlog Komisije za izbor i imenovanja, na inicijativu Kluba vijećnika Stranke demokratske akcije za izmjene članova savjeta mjesnih zajednica, koji je pročitala Sekretar Gradskog vijeća Tuzla i pozivam vijećnike da aktiviraju uređaje za elektronsko glasanje i da se pritiskom na odgovarajući taster izjasne za prijedlog, ili protiv prijedloga, ili kao suzdržani u odnosu na prijedlog. Glasanje je okončano.

Konstatujem da je za ovaj prijedlog Komisije za izbor i imenovanja, na inicijativu Kluba vijećnika Stranke demokratske akcije, 8 vijećnika je glasalo za, 3 vijećnika je bilo protiv, i 16 vijećnika je bilo suzdržano, tako da prijedlog Komisije za izbor i imenovanja, na inicijativu Kluba vijećnika Stranke demokratske akcije a za izmjene članova savjeta mjesnih zajednica nije dobio potrebnu većinu.

Prelazimo na četvrtu tačku dnevnog reda:

### **TEKUĆA PITANJA**

S obzirom da nije bilo prijedloga koji bi se razmatrali u okviru ove tačke dnevnog reda, konstatujem da smo iscrpili Dnevni red i zaključujem 23. redovnu sjednicu Gradskog vijeća Tuzla u 12:36 minuta.

### **STENOGRAM SAČINILI:**

**Senada Karabegović**

**Jasminka Delalić**

### **P R E D S J E D A V A J U Ć I**

**dr.med.sci. Aleksandar Vujadinović s.r.**